



Comhairle an
Aontais Eorpaigh

An Bhruiséil, 23 Bealtaine 2018
(OR. en)

9058/18

**Comhad Idirinstitiúideach:
2016/0361 (COD)**

**EF 138
ECOFIN 434
CODEC 814**

NÓTA

ó:	An Uachtaránacht
chuig:	na toscaireachtaí
Ábhar:	Togra le haghaidh RIALACHÁN Ó PHARLAIMINT NA hEORPA AGUS ÓN gCOMHAIRLE lena leasaítear Rialachán (AE) Uimh. 806/2014 i ndáil le cumas ionsúcháin caillteanais agus athchaipitliúcháin le haghaidh institiúidí creidmheasa agus gnólachtaí infheistíochta - <i>Téacs comhréitigh ón Uachtaránacht</i>

Gheobhaidh na toscaireachtaí, anseo thíos, téacs comhréitigh ón Uachtaránacht maidir leis an togra thuasluaite, atá le cur faoi bhráid na Comhairle ar an 25 Bealtaine 2018.

Togra maidir le

RIALACHÁN Ó PHARLAIMINT NA hEORPA AGUS ÓN gCOMHAIRLE

lena leasaítear Rialachán (AE) Uimh. 806/2014 i ndáil le cumas ionsúcháin caillteanais agus athchaipitliúcháin le haghaidh institiúidí creidmheasa agus gnólachtaí infheistíochta

(Téacs atá ábhartha maidir le LEE)

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 114 de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ón mBanc Ceannais Eorpach¹,

Ag féachaint don tuairim ó Choiste Eacnamaíoch agus Sóisialta na hEorpa²,

Ag gníomhú dóibh i gcomhréir leis an ngnáthnós imeachta reachtach,

¹ IO C [...], [...], lch. [...].

² IO C [...], [...], lch. [...].

De bharr an méid seo a leanas:

- (1) D'fhoilsigh an Bord um Chobhsaíocht Airgeadais (FSB) Bileog Téarmaí ('caighdeán TLAC') an chumais iomláin ionsúcháin caillteanais (TLAC) an 9 Samhain 2015 agus d'fhorhuinigh G-20 é i Samhain 2015. Is é cuspóir chaighdeán TLAC a áirithiú i gcás bainc a bhfuil tábhacht shistéamach dhomhanda leo (G-SIBanna), dá ngairtear institiúidí a bhfuil tábhacht shistéamach dhomhanda leo (G-SIIanna) i gcreat an Aontais, go bhfuil cumas ionsúcháin caillteanais agus athchaipitliúcháin acu chun a áirithiú, nuair a bheidh réiteach á dhéanamh agus díreach ina dhiaidh sin, gur féidir leanúint le feidhmeanna criticiúla gan cistí na gcáiníocóirí (cistí poiblí) ná cobhsaíocht airgeadais a chur i mbaol. Sa teachtaireacht uaidh an 24 Samhain 2015³, gheall an Coimisiún go gcuirfeadh sé togra reachtach chun cinn faoi dheireadh 2016, togra lena bhféadfaí caighdeán TLAC a chur chun feidhme faoin sprioc-am a comhaontaíodh go hidirnáisiúnta, mar atá 2019.
- (2) Nuair a bheifear ag cur chaighdeán TLAC chun feidhme san Aontas, ní mór an t-íoscheanglas institiúid-sonrach atá ann cheana maidir le cistí dílse agus dliteanais incháilithe ('ICDI') a chur san áireamh, íoscheanglas is infheidhme maidir le hinstitiúidí uile an Aontais mar a leagtar síos i dTreoir 2014/59/AE ó Pharlaimint na hEorpa agus ón gComhairle⁴. Ós rud é go bhfuil an t-aon chuspóir amháin ag an TLAC agus ag an ICDI, mar atá a áirithiú go mbeidh cumas leordhóthanach ionsúcháin caillteanais agus athchaipitliúcháin ag institiúidí an Aontais, ba cheart an dá cheanglas a bheith ina ngnéithe comhlántacha de chomhchreat.

³ Teachtaireacht ón gCoimisiún chuig Parlaimint na hEorpa, chuig an gComhairle, chuig an mBanc Ceannais Eorpach, chuig Coiste Eacnamaíoch agus Sóisialta na hEorpa, agus chuig Coiste na Réigiún, "I dTreo an tAontas Baincéireachta a Thabhairt chun Críche", 24.11.2015, COM(2015) 587 final.

⁴ Treoir 2014/59/AE ó Pharlaimint na hEorpa agus ón gComhairle an 15 Bealtaine 2014 lena mbunaítear creat le haghaidh téarnamh agus réiteach institiúidí creidmheasa agus gnólachtaí infheistíochta, IO L 173, 12.6.2014, lch. 190

Ó thaobh na hoibríochta, mhol an Coimisiún gur cheart íosleibhéal comhchuibhithe chaighdeán TLAC do G-SIIanna ('íoscheanglas TLAC') a thabhairt isteach i reachtaíocht an Aontais trí leasuithe ar Rialachán (AE) Uimh. 575/2013⁵, agus ba cheart an forlíontán institiúid-sonrach do G-SIIanna agus an ceanglas institiúid-sonrach d'eintitis nach G-SIIanna iad, dá ndéantar tagairt mar íoscheanglas maidir le cistí dílse agus dliteanais incháilithe, ba cheart aghaidh a thabhairt orthu le leasuithe spriocdhírthe ar Threoir 2014/59/AE agus ar Rialachán (AE) Uimh. 806/2014⁶. Ba cheart forálacha ábhartha an Rialacháin seo maidir le cumas ionsúcháin caillteanais agus cumas athchaipitliúcháin na n-institiúidí a chur i bhfeidhm in éineacht leo sin go comhsheasmhach sna píosaí reachtaíochta thuasluaite agus i dTreoir 2013/36/AE⁷.

- (3) In éagmais rialacha comhchuibhithe sna Ballstáit atá rannpháirteach sa Sásra Réitigh Aonair maidir le cur chun feidhme chaighdeán TLAC san Aontas, chuirfí costais bhreise ar institiúidí, bheadh éiginnteacht dhlíthiúil ann agus ba dheacra an uirlis tarrthála inmheánaigh le haghaidh institiúidí trasteorann a chur i bhfeidhm. In éagmais na rialacha comhchuibhithe sin ar leibhéal an Aontais thiocfadh saobhadh iomaíochta sa mhargadh inmheánach chun cinn freisin ar an ábhar go bhféadfadh na costais a bheadh ar institiúidí i dtaca leis na ceanglais atá ann faoi láthair agus caighdeán TLAC a chomhlíonadh, go bhféadfaidís sin bheith an-éagsúil sna Ballstáit atá rannpháirteach. Is den riachtanas, dá bhrí sin, deireadh a chur leis na baic sin ar fheidhmiú an mhargaidh inmheánaigh, agus an saobhadh iomaíochta a sheachaint a thiocfadh chun cinn in éagmais rialacha comhchuibhithe ar leibhéal an Aontais maidir le cur chun feidhme chaighdeán TLAC. Dá bhrí sin, is é an bunús dlí iomchuí don Rialachán seo Airteagal 114 den Chonradh ar Fheidhmiú an Aontais Eorpaigh (CFAE), mar a léirmhínítear i gcomhréir le cásdlí Chúirt Bhreithiúnais an Aontais Eorpaigh.

⁵ Rialachán (AE) Uimh. 575/2013 ó Pharlaimint na hEorpa agus ón gComhairle an 26 Meitheamh 2013 maidir le ceanglais stuamachta i gcomhair institiúidí creidmheasa agus gnólachtaí infheistíochta, agus lena leasaítear Rialachán (AE) Uimh. 648/2012, IO L176, 27.6.2013, lch.1

⁶ Rialachán (AE) Uimh. 806/2014 ó Pharlaimint na hEorpa agus ón gComhairle an 15 Iúil 2014 lena mbunaítear rialacha aonfhoirmeacha agus nós imeachta aonfhoirmeach maidir le réiteach institiúidí creidmheasa agus gnólachtaí infheistíochta áirithe faoi chuimsiú Sásra Réitigh Aonair agus Ciste Réitigh Aonair agus lena leasaítear Rialachán (AE) Uimh. 1093/2010, IO L 225, 30.7.2014, lch. 1

⁷ Treoir 2013/36/AE ó Pharlaimint na hEorpa agus ón gComhairle an 26 Meitheamh 2013 maidir le rochtain ar ghníomhaíocht institiúidí creidmheasa agus maoirseacht stuamachta ar institiúidí creidmheasa agus ar ghnólachtaí infheistíochta, lena leasaítear Treoir 2002/87/CE agus lena n-aisghairtear Treoir 2006/48/CE agus Treoir 2006/49/CE (IO L 176, 27.6.2013, lch. 338)

- (4) Ba cheart aitheantas a thabhairt fós i Rialachán (AE) Uimh. 806/2014 do straitéisí réitigh an Phointe Iontrála Aonair (SPE) agus na nIlphointí Iontrála (MPE). Faoi straitéis SPE, ní dhéantar réiteach ach ar aon ghrúpeintiteas amháin, go hiondúil ar an máthairghnóthas; maidir leis na grúpeintitis eile, ar fochuideachtaí oibriúcháin iad de ghnáth, ní chuirtear iad sin faoi réiteach: aistríonn siad a gcaillteanais agus a riachtanais athchaipitliúcháin chuig an eintiteas réamhtheachtach lena réiteach. Faoi straitéis MPE, féadfar níos mó ná aon eintiteas amháin a réiteach. Is den tábhacht eintitis atá le réiteach ('eintitis réitigh'), is é sin a bhféadfaí gníomhaíochtaí réitigh a chur i bhfeidhm ina leith, i dteannta fochuideachtaí ar leis na heintitis sin iad ('grúpaí réitigh') a aithint go soiléir ionas gur féidir an straitéis réitigh a theastaíonn a chur i bhfeidhm go héifeachtach. Is den tábhacht iad a aithint freisin ionas gur féidir a chinneadh cén leibhéal cur i bhfeidhm ba cheart do ghnólachtaí airgeadais a chomhlíonadh i dtaca leis na rialacha maidir le cumas ionsúcháin caillteanais agus cumas athchaipitliúcháin. Is den riachtanas, dá bhrí sin, coincheapa an 'eintitis réitigh' agus an 'ghrúpa réitigh' a thabhairt isteach agus leasú a dhéanamh ar Rialachán (AE) Uimh. 806/2014 a bhaineann le pleananna réitigh grúpa chun é a chur de cheangal go sainráite ar an mBord Réitigh Aonair (an Bord) na heintitis réitigh agus na grúpaí réitigh laistigh de ghrúpa a aithint agus na himpleachtaí a d'fhéadfadh a bheith ag aon ghníomhaíocht laistigh de ghrúpa atá beartaithe a mheas mar is iomchuí chun réiteach grúpa éifeachtach a áirithiú.
- (5) Ba cheart don Bhord a áirithiú go bhfuil cumas leordhóthanach ionsúcháin caillteanais agus cumas leordhóthanach athchaipitliúcháin ag institiúidí chun a áirithiú go n-ionsúfar na caillteanais agus go ndéanfar athchaipitliú go mín agus go tapúil sa chaoi go mbeidh an tionchar is lú is féidir ar chobhsaíocht airgeadais agus ar cháiniocóirí. Chun é sin a dhéanamh ba cheart d'institiúidí ceanglas institiúid-sonrach maidir le cistí dílse agus dliteanais incháilithe ('ICDI') a chomhlíonadh dá bhforáiltear i Rialachán (AE) Uimh. 806/2014.
- (6) Chun na hainmneoirí lena dtomhaistear cumas ionsúcháin caillteanais agus cumas athchaipitliúcháin na n-institiúidí a ailíniú leis na hainmneoirí dá bhforáiltear i gcaighdeán TLAC, ba cheart ICDI a shloinneadh mar chéatadán de mhéid iomlán na neamhchosanta ar riosca agus thomhas neamhchosanta chóimheas gearála na h-institiúide lena mbaineann.

- (7) Na critéir incháilitheachta i leith dliteanais le haghaidh ICDI, ar dliteanais iad ar féidir tarrtháil inmheánach a dhéanamh orthu, ba cheart iad a ailíniú go dlúth leis na critéir a leagtar síos i Rialachán (AE) Uimh. 575/2013 le haghaidh íoscheanglas TLAC, agus é sin i gcomhréir leis na coigeartuithe agus na ceanglais chomhlántacha a thugtar isteach sa Rialachán seo. Ba cheart, go háirithe, go mbeadh ionstraimí fiachais áirithe ag a bhfuil comhpháirt dhíorthach leabaithe, amhail nótaí struchtúrtha áirithe, ba cheart go mbeidís sin incháilithe chun an ICDI a chomhlíonadh sa mhéid go bhfuil príomhshuim sheasta nó mhéadaitheach acu is inaisíoctha tráth a haibíochta agus atá ar eolas roimh ré, níl nasctha leis an díorthach ach pé toradh breise a bhíonn ann agus braitheann sin ar fheidhmíocht na sócmhainne tagartha. I bhfianaise na príomhshuime sin, ba cheart go mbeadh cumas ardionsúcháin caillteanais ag na hionstraimí sin agus go bhféadfaí tarrtháil inmheánach a dhéanamh orthu go héasca i gcás réitigh.
- (8) Tá na dliteanais uile ar toradh iad ar éilimh gnáthchreidiúnaithe gan urrús (dliteanais neamh-fho-ordaithe) san áireamh sa raon dliteanas a úsáidtear chun ICDI a chomhlíonadh, ach amháin i gcás nach gcomhlíonann siad na sainchritéir incháilitheachta dá bhforáiltear sa Rialachán seo. Chun feabhas a chur ar inréititheacht institiúidí trí úsáid éifeachtach a bhaint as an uirlis tarrthála inmheánaí, ba cheart é a bheith ar chumas an Bhoird a cheangal go ndéanfar an ceanglas gnólacht-sonrach a chomhlíonadh trí bhíthin dliteanais fo-ordaithe, go háirithe nuair is riléir gur dócha go n-iompróidh creidiúnaithe ar a ndéanfar tarrtháil inmheánach, go n-iompróidh siad caillteanais i gcás réitigh ar mó iad ná a gcaillteanais ionchasacha i gcás dócmhainneachta. Ba cheart don Bhord measúnú a dhéanamh ar an ngá atá lena chur de cheangal ar institiúidí ICDI a chomhlíonadh le dliteanais fo-ordaithe, i gcás inarb ionann méid na ndliteanas a eisítear ó chur i bhfeidhm na huirlise tarrthála inmheánaí agus tairseach áirithe laistigh d'aicme dliteanas lena n-áirítear dliteanais incháilithe ICDI. An ceanglas maidir le ICDI a chomhlíonadh le dliteanais fo-ordaithe, ba cheart sin a iarraidh a mhéid is gá chun a áirithiú nach mó caillteanais creidiúnaithe i gcás réitigh ná na caillteanais a thabhóidís i gcás dócmhainneachta. Ba cheart aon fho-ordú ar ionstraimí fiachais a iarrann an Bord chun críocha ICDI a bheith gan dochar don fhéidearthacht íoscheanglas TLAC a chomhlíonadh go páirteach le hionstraimí fiachais neamh-fho-ordaithe i gcomhréir le Rialachán (AE) Uimh. 575/2013 agus mar a cheadaítear de réir chaighdeán TLAC.

I gcás eintiteas réitigh G-SIIanna nó banc ardleibhéil a bhfuil sócmhainní grúpa réitigh os cionn 100 billiún Euro acu, ba cheart don Bhord a bheith in ann, go lánroghnach, ar bhonn critéar áirithe, agus leitheadúlacht taiscí agus neamhláithreachta ionstraimí fiachais sa mhúnla cistithe, rochtain shrianta ar mhargaí caipitil do dhliteanais incháilithe agus spleáchas ar Ghnáthchothromas Leibhéil 1 chun ICDI a chomhlíonadh á gcur san áireamh aige, a cheangal go gcomhlíontar cuid den ICDI, arb ionann é agus leibhéil an ionsúcháin caillteanais agus an athchaipitliúcháin dá dtagraítear in Airteagail 37(10) agus 44(5) de Threoir 2014/59/AE, le dliteanais fho-ordaithe agus cistí dílse, lena n-áirítear cistí dílse a úsáidtear chun an ceanglas maoláin chaipitil chomhcheangailte dá dtagraítear i dTreoir 2013/36/AE a shásamh. Arna iarraidh sin d'eintiteas réitigh, ba cheart go mbeadh na húdaráis réitigh in ann an ceanglas sin a laghdú go teorainn is ionann agus cionroinnt an laghdaithe is ceadmhach faoi Airteagal 72b(3) de Rialachán (AE) Uimh. 575/2013 i dtaca leis an íoscheanglas TLAC arna leagan síos sa Rialachán sin.

I gcomhréir le prionsabal na comhréireachta, féadfaidh an Bord an chumhacht a fheidhmiú chun a cheangal go gcomhlíontar ICDI trí bhíthin dliteanais fho-ordaithe a mhéid nach airde é leibhéil foriomlán an fho-ordaithe a cheanglaítear i bhfoirm cistí dílse agus ítimí dliteanas incháilithe mar gheall ar an oibleagáid atá ar institiúidí TLAC, ICDI, agus i gcás inarb infheidhme, an ceanglas maoláin chaipitil chomhcheangailte faoi Threoir 2013/36/AE a chomhlíonadh, ná leibhéil an iompartha caillteanais agus an athchaipitliúcháin dá dtagraítear in Airteagal 27(7) de Rialachán (AE) Uimh. 806/2014, ná an fhoirmle bunaithe ar cheanglais stuamachta cholún 1 agus colún 2 agus an ceanglas maoláin chaipitil chomhcheangailte. .

- (9) Le ICDI, ba cheart go bhféadfadh institiúidí na caillteanais a bhfuiltear ag súil leo i gcás réitigh nó ag pointe na neamh-inmharthanachta a iompar de réir mar is iomchuí agus an institiúid a athchaipitliú tar éis na ngníomhaíochtaí dá bhforáiltear sa phlean réitigh a chur chun feidhme agus an réiteach ón ngrúpa réitigh. Ba cheart don Bhord, ar bhonn na straitéise réitigh a roghnaigh siad, údar cuí a thabhairt le leibhéal ICDI a d'fhorchuir siad agus ba cheart dó an leibhéal sin a athbhreithniú gan aon mhoill mhíchui chun aon athrú ar leibhéal an cheanglais dá dtagraítear in Airteagal 104a de Threoir 2013/36/AE a léiriú. Mar sin, is é ba cheart a bheith sa leibhéal sin suim mhéid na gcaillteanas lena bhfuiltear ag súil i gcás réitigh, a chomhfhreagraíonn do cheanglais cistí dílse na hinstitiúide féin agus do mhéid an athchaipitliúcháin lenar féidir leis an institiúid, tar éis an réitigh nó tar éis na cumhachtaí díluachála nó comhshó a fheidhmiú, na ceanglais cistí dílse sin dá cuid is gá lena gníomhaíochtaí féin a shaothrú faoin straitéis réitigh a roghnaíodh a chomhlíonadh. Ba cheart ICDI a shloinneadh mar chéatadán de mhéid iomlán na neamhchosanta ar riosca agus thomhas neamhchosanta an chóimheasa gearála agus ba cheart d'institiúidí na leibhéil a bheidh mar thoradh ar an dá thomhas sin a chomhlíonadh. Ba cheart don Bhord na méideanna athchaipitliúcháin a choigeartú síos nó suas i gcás aon athruithe a thagann as na ngníomhaíochtaí dá bhforáiltear sa phlean réitigh. Ba cheart go mbeadh an Bord in ann freisin an méid athchaipitliúcháin a mhéadú chun muinín leordhóthanach sa mhargadh a áirithiú san institiúid tar éis gníomhaíochtaí dá bhforáiltear sa phlean réitigh a chur chun feidhme. Maidir le leibhéal an mhaoláin mhuiníne sa mhargadh a iarradh, ba cheart go bhféadfadh an institiúid leanúint de na ceanglais údarúcháin atá uirthi a chomhlíonadh ar feadh tréimhse iomchuí, lena n-áirítear tríd an deis a thabhairt don institiúid na costais a chumhdach a bhaineann le hathstruchtúrú a gníomhaíochtaí tar éis an réitigh agus muinín an mhargaidh leordhóthanach a bhuanú. Ba cheart an maolán muiníne margaidh a shocrú trí thagairt a dhéanamh do chuid den cheanglas maoláin chaipitil chomhcheangailte faoi Threoir 2013/36/AE. Ba cheart don Bhord leibhéal an mhaoláin muiníne margaidh a choigeartú go leibhéal níos ísle i gcás inar leor leibhéal níos ísle chun muinín leordhóthanach mhargaidh a áirithiú nó ba cheart dó an leibhéal sin a choigeartú go leibhéal níos airde i gcás ina dteastaíonn leibhéal níos airde chun a áirithiú gurb amhlaidh, tar éis na ngníomhaíochtaí dá bhforáiltear sa phlean réitigh, go leanann an t-eintiteas de na coinníollacha maidir lena údarú a chomhlíonadh go ceann tréimhse iomchuí ama agus muinín an mhargaidh leordhóthanach a bhuanú.

- (9a) I gcomhréir le Rialachán Tarmligthe (AE) 2016/1075 ón gCoimisiún, scrúdóidh an Bord bonn infheisteoirí ionstraimí ICDI institiúidí aonair. Má dhéanann infheisteoirí miondíola, ar dócha nach bhfuair siad léiriú cothrom feiceálach ar na rioscaí ábhartha, cuid shuntasach de ICDI institiúid a choinneáil, d'fhéadfadh an méid sin bheith ina bhac d'inréititheacht. Ag an am céanna, má choinníonn institiúidí eile cuid mhór de ICDI institiúide, d'fhéadfadh cineál córasach díluachála nó comhshó bheith ina bhac ar inréititheacht freisin. Dá n-aimseodh an Bord bac ar inréititheacht mar thoradh ar mhéid agus ar chineál bonn infheisteoirí áirithe, d'fhéadfadh sé a mholadh d'institiúid aghaidh a thabhairt ar an mbac sin. Ag an am céanna, d'fhéadfaí srian a chur le díol agus le margú ionstraimí áirithe d'infheisteoirí áirithe tríd an dlí náisiúnta.
- (10) Chun inréititheacht na G-SIIanna a fheabhsú, ba cheart an deis a bheith ag an mBord ICDI institiúid-sonrach a fhorchur orthu sin sa bhreis ar íoscheanglas TLAC dá bhforáiltear i Rialachán (AE) Uimh. 575/2013. Ba cheart an ICDI institiúid-sonrach sin a fhorchur i gcás nach leor íoscheanglas TLAC chun caillteanais G-SII a iompar agus chun athchaipitliú a dhéanamh air faoin straitéis réitigh a roghnaíodh.

- (11) Agus leibhéal ICDI á shocrú, ba cheart don Bhord méid na tábhachta sistéamaí atá le hinstitiúid a chur san áireamh chomh maith leis an drochthionchar ar an gcobhsaíocht airgeadais a d'fhéadfadh a bheith ann dá gclisfí uirthi. Ba cheart don Bhord an gá atá le cothrom na Féinne idir na G-SIIanna agus institiúidí inchomparáide eile sna Ballstáit atá rannpháirteach a bhfuil tábhacht shistéamach leo a chur san áireamh. Dá bhrí sin, níor cheart go n-imeodh ICDI na n-institiúidí sin nach bhfuil aitheanta mar G-SIIanna ach a bhfuil tábhacht shistéamach leo sna Ballstáit atá rannpháirteach atá inchomparáide le tábhacht shistéamach na G-SIIanna, níor cheart go n-imeodh sin go díréireach ó leibhéal ICDL agus óna chomhdhéanamh sin atá socraithe i gcoitinne do G-SIIanna.
- (12)
- (13) I gcomhréir le Rialachán Uimh. 575/2013, ba cheart institiúidí a cháilíonn mar eintitis réitigh a bheith faoi réir ICDI ar leibhéal an ghrúpa réitigh chomhdhlúite agus ar an leibhéal sin amháin. Fágann sin gur cheart oibleagáid a bheith ar eintitis réitigh ionstraimí agus ítimí is incháilithe ar mhaithe le comhlíonadh ICDI a eisiúint chuig creidiúnaithe tríú tír seachtracha a ndéanfaí tarrtháil inmheánach orthu i gcás ina dtionscnófaí próiseas réitigh i leith an eintitis réitigh.

- (14) Institiúidí nach eintitis réitigh iad ba cheart dóibh an ICDL a chomhlíonadh ar an leibhéal aonair. Ba cheart dá n-eintitis réitigh féin, de ghnáth, riachtanais iompartha caillteanais agus riachtanais athchaipitliúcháin na n-institiúidí sin a chumhdach agus is é ba cheart do na heintitis réitigh a dhéanamh chuige sin ionstraimí cistí dílse agus na dliteanais incháilithe a d'eisigh na h-institiúidí sin a fháil go díreach nó go hindíreach agus iad a dhíluacháil agus a chomhshó ina n-ionstraimí úinéireachta tráth nach mbeidh na h-institiúidí sin inmharthana a thuilleadh. Mar sin, ICDI is infheidhme maidir le h-institiúidí nach eintitis réitigh iad, ba cheart é a chur i bhfeidhm ar dhóigh leanúnach i dteannta na gceanglas is infheidhme maidir le heintitis réitigh. Ba cheart, dá bharr sin, go bhféadfadh an Bord grúpa réitigh a réiteach gan roinnt dá fhochuideachtaí a chur faoi réiteach, rud a chuirfeadh cosc le haon suaitheadh sa mhargadh a d'fhéadfadh titim amach murach sin. Más rud é go bhfuil an t-eintiteas réitigh nó an mháthairchuideachta agus a fochuideachtaí bunaithe sa Bhallstát céanna agus gur cuid den ghrúpa réitigh céanna iad, ba cheart go mbeadh an Bord in ann cur i bhfeidhm ICDI is infheidhme maidir le h-institiúidí nach eintitis réitigh iad a tharscaoileadh go hiomlán nó iad a cheadú ICDI a chomhlíonadh le ráthaíochtaí comhthaobhaithe idir an mháthairchuideachta agus a fochuideachtaí, ráthaíochtaí ar féidir a thionscnamh ar chomhlíonadh na gcoinníollacha uainiúcháin céanna atá ann maidir le díluacháil nó comhshó dliteanas inmheánach. Ba cheart an chomhthaobhacht atá ina cúltaca ag an ráthaíocht a bheith ardleachtach agus riosca an-íseal a bheith léi.
- (15) Ba cheart ICDI a chur i bhfeidhm in institiúidí nach eintitis réitigh iad i gcomhréir leis an straitéis um réiteach roghnaithe. Go háirithe, níor cheart an ghaolmhaireacht úinéireachta idir na h-institiúidí agus a ghrúpa réitigh i ndiaidh athchaipitliú na n-institiúidí sin athrú mar gheall ar an gcur i bhfeidhm sin.

- (15a) Foráiltear le Rialachán Uimh. 575/2013 go bhféadfaidh údaráis inniúla cur i bhfeidhm ceanglais áirithe sócmhainneachta agus leachtachta a tharscaoileadh i gcás institiúidí creidmheasa atá cleamhnaithe go buan le comhlacht lárnach i gcás ina gcomhlíontar coinníollacha sonracha áirithe. Chun aird a thabhairt ar shainiúlachtaí na líonraí comhoibritheacha sin, ba cheart don Bhord a bheith in ann, freisin, cur i bhfeidhm ICDI ar na hinstitiúidí creidmheasa sin a tharscaoileadh faoi choinníollacha atá comhchosúil leo siúd atá i Rialachán Uimh. 575/2013 i gcás ina mbeidh institiúidí creidmheasa agus an comhlacht lárnach bunaithe sa Bhallstát céanna agus ba cheart dó bheith in ann déileáil leo ina n-iomláine agus na coinníollacha maidir le réiteach á measúnú aige. Ag brath ar ghnéithe den sásra dlúthpháirtíochta atá ag gach grúpa, féadfar a áirithiú go gcomhlíonfar ceanglas seachtrach ICDI an ghrúpa réitigh ina iomláine ar bhealaí éagsúla, is e sin dliteanais incháilithe an ghrúpa lárnaigh amháin a chomhaireamh, nó dliteanais incháilithe roinnt eintiteas sa líonra nó na n-eintiteas ar fad sa líonra a chomhaireamh.
- (16) Ba cheart do na húdaráis inniúla, do na húdaráis réitigh agus don Bhord aghaidh a thabhairt ar aon sárúithe ar íoscheanglas TLAC agus an ICDI agus iad a leigheas. Ós rud é gurbh fhéidir go mbeadh sárú ar na ceanglais sin ina bhacainn roimh inréititheacht institiúide nó grúpa, ba cheart na nósanna imeachta atá ann cheana chun bacainní roimh inréititheacht a ghiorrú chun go dtabharfar aghaidh go tapa ar aon sárúithe ar na ceanglais sin. Lena chois sin, ba cheart é a bheith ar chumas an Bhoird é a chur de cheangal ar institiúidí próifilí aibíochta ionstraimí agus ítimí incháilithe a mhionathrú agus pleananna a ullmhú agus a chur chun feidhme chun leibhéal na gceanglas sin a athchóiriú.
- (17) Comhlíonann an Rialachán seo na cearta bunúsacha agus urramaíonn sé na prionsabail a bhfuil aithint tugtha dóibh go háirithe sa Chairt, amhail na cearta chun maoine agus an tsaoirse fiontraíochta, agus ní mór é a chur i bhfeidhm i gcomhréir leis na cearta agus na prionsabail sin.

- (18) Ós rud é nach féidir leis na Ballstáit cuspóirí an Rialacháin seo, mar atá rialacha aonfhoirmeacha a leagan síos chun críocha chreat téarnaimh agus réitigh an Aontais, a chomhlíonadh go leordhóthanach agus ós rud é gur féidir, de bharr scála na gníomhaíochta, na cuspóirí a chomhlíonadh níos fearr ag leibhéal an Aontais, féadfaidh an tAontas an Rialachán seo a ghlacadh, i gcomhréir le prionsabal na coimhdeachta mar atá leagtha amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Rialachán seo thar a bhfuil riachtanach chun na cuspóirí sin a ghnóthú.
- (19) D'fhonn tréimhse iomchuí a cheadú chun an Rialachán seo a chur i bhfeidhm, ba cheart an Rialachán seo a chur i bhfeidhm 18 mí óna theacht i bhfeidhm.

TAR ÉIS AN RIALACHÁN SEO A GHLACADH:

Airteagal 1

Leasuithe ar Rialachán (AE) Uimh. 806/2014

1. *Leasaítear Airteagal 3(1) mar a leanas:*

(a) cuirtear isteach na pointí seo a leanas:

"(24a) ciallaíonn 'eintiteas réitigh' eintiteas arna bhunú i mBallstát rannpháirteach a aithníonn an Bord i gcomhréir le hAirteagal 8 mar eintiteas dá bhforáiltear do ghníomhaíocht réitigh sa phlean réitigh ar a bhonn;

(24b) ciallaíonn 'grúpa réitigh':

(a) eintiteas réitigh agus a fhochuideachtaí nach bhfuil mar seo a leanas:

(i) ina n-eintitis réitigh iad féin; nó

(ii) ina bhfochuideachtaí de chuid eintitis réitigh eile; nó

(iii) ina n-eintitis atá bunaithe i dtríú tír nach n-áirítear sa ghrúpa réitigh i gcomhréir leis an bplean réitigh agus a bhfochuideachtaí;

(b) institiúidí creidmheasa atá cleamhnaithe le comhlacht lárnach, an comhlacht lárnach agus aon institiúid atá faoi rialú an chomhlachta lárnaigh i gcás inarb eintiteas réitigh é ceann amháin de na heintitis sin.

(24c) ciallaíonn 'institiúid dhomhanda a bhfuil tábhacht shistéamach léi' (G-SII) G-SII mar a shainmhínítear í i bpointe (132) d'Airteagal 4(1) de Rialachán (AE) Uimh. 575/2013"

(b) i bpointí (48), (49), pointe (d) d'Airteagal 20(5), Airteagail 27(1), (4), (5), (6), (7) agus (13), cuirtear 'dliteanais intarrthála' in áit 'dliteanais incháilithe'.

(c) cuirtear isteach an pointe (49a) seo a leanas:

'(49a) Ciallaíonn 'dliteanais incháilithe' dliteanais ar féidir tarrtháil inmheánach a dhéanamh orthu agus lena gcomhlíontar coinníollacha Airteagal 12c nó phointe (a) d'Airteagal 12h(3).''

2. In Airteagal 7, cuirtear an méid seo a leanas in ionad phointe (d) de mhír (3):

'(d) leibhéal an íoscheanglais le haghaidh cistí dílse agus dliteanas incháilithe a shocrú, i gcomhréir le hAirteagal 12 go 12k'.

3. Leasaítear Airteagal 8 mar a leanas:

(a) cuirtear an méid seo a leanas in ionad mhír (5):

'5. Leagfar amach sa phlean réitigh roghanna chun na huirlisí réitigh a chur i bhfeidhm agus na cumhachtaí réitigh a fheidhmiú dá dtagraítear sa Rialachán seo maidir leis na heintitis dá dtagraítear i mír 1.'.

(b) Cuirtear an méid seo a leanas in ionad na chéad fhomhíre agus an dara fomhír de mhír 6:

'Déanfar foráil sa phlean réitigh maidir leis na gníomhaíochtaí réitigh a fhéadfaidh an Bord a dhéanamh i gcás ina gcomhlíonfaidh eintiteas dá dtagraítear i mír 1 na coinníollacha maidir le réiteach.

Déanfar an fhaisnéis dá dtagraítear i bpointe (a) i mír 9 a nochtadh don eintiteas lena mbaineann.'.

(c) Cuirtear an méid seo a leanas in ionad phointe (o) agus pointe (p) de mhír (9):

'(o) na ceanglais dá dtagraítear in Airteagal 12g agus 12 h agus spriocdháta chun an leibhéal sin a bhaint amach, i gcás inarb infheidhme;"

"(p) nuair a chuireann an Bord Airteagal 12c(3) i bhfeidhm, spriocdháta do chomhlíonadh ag an eintiteas réitigh."

(c1) In Airteagal 8(9), cuirtear isteach an fhomhír seo a leanas:

"Agus spriocdhátaí á leagan síos dá dtagraítear i bpointe (o) agus i bpointe (p) den chéad fhomhír, áiritheofar, leis an bplean réitigh, go mbeidh na spriocdhátaí sin iomchuí agus go dtabharfar an méid seo a leanas san áireamh leo:

(a) leitheadúlacht taiscí agus neamhláithreacht ionstraimí fiachais sa tsamhail chistiúcháin;

(b) an rochtain theoranta ar na margaí caipitil do dhliteanais incháilithe;

(c) an spleáchas ar Ghnáthchothromas Leibhéal 1 chun freastal ar an riachtanas dá dtagraítear in Airteagal 12g."

(d) cuirtear an méid seo a leanas in ionad mhír (10):

'Áireofar i 10 bplean réitigh grúpa plean maidir le réiteach an ghrúpa dá dtagraítear i mír 1, a mbeidh máthairghnóthas an Aontais atá bunaithe i mBallstát rannpháirteach i gceannas air agus sainaitheofar bearta a bheidh le déanamh i leith an mhéid seo a leanas:

(a) máthairghnóthas an Aontais;

(b) na focuideachtaí ar cuid den ghrúpa iad agus atá bunaithe san Aontas;

(c) na heintitis dá dtagraítear in Airteagal 2(b); agus

(d) faoi réir Airteagal 33, na focuideachtaí ar cuid den ghrúpa iad agus atá bunaithe lasmuigh den Aontas.

I gcomhréir leis na bearta dá dtagraítear sa chéad fhomhír, sainaitheofar sa phlean réitigh an méid seo a leanas le haghaidh gach grúpa:

(a) na heintitis réitigh;

(b) na grúpaí réitigh.';

(e) cuirtear an méid seo a leanas in ionad phointe (a) agus pointe (b) de mhír (11):

"(a) na gníomhaíochtaí réitigh a leagan amach dá bhforáiltear i ndáil le heintiteas réitigh sna cásanna dá bhforáiltear i mír 6 agus impleachtaí gníomhaíochtaí den sórt sin maidir le grúpeintitis eile, an máthairghnóthas agus fo-institiúidí dá dtagraítear i mír 1;

(a1) i gcás ina bhfuil níos mó ná grúpa réitigh amháin i ngrúpa dá dtagraítear i mír 1, gníomhaíocht réitigh a bhfuiltear ag súil léi i ndáil le heintitis réitigh gach grúpa réitigh agus impleachtaí gníomhaíochtaí den sórt sin ar an dá phointe seo a leanas:

(i) grúpeintitis eile a bhaineann leis an ngrúpa réitigh chéanna;

(ii) grúpaí réitigh eile;

(b) scrúdú a dhéanamh ar a mhéid a d'fhéadfaí na huirlisí agus na cumhachtaí réitigh a chur i bhfeidhm ar eintitis réitigh bunaithe san Aontas agus a fheidhmiú ar bhealach comhordaithe, lena n-áirítear bearta chun ceannach á dhéanamh ag tríú páirtí den ghrúpa ina iomláine, nó línte nó gníomhaíochtaí gnó ar leith a sheachadann roinnt grúpeintiteas, nó grúpeintitis nó grúpaí réitigh ar leith, agus aon bhaic ionchasacha ar réiteach comhordaithe a shainaithint;

(f) cuirtear na fomhíreanna seo a leanas isteach i mír (12):

"Déanfar an plean réitigh a athbhreithniú de réir mar is iomchuí tar éis gníomhaíochtaí réitigh a chur chun feidhme nó tar éis feidhmiú na gcumhachtaí dá dtagraítear in Airteagal 21.

Agus na spriocdhátaí dá dtagraítear i bpointe (o) agus i bpointe (p) d'Airteagal 8(9) á leagan síos, déanfaidh an Bord an spriocdháta chun an ceanglas dá dtagraítear in Airteagal 104b de Threoir 2013/36/AE a chomhlíonadh a chur san áireamh".

4. Leasaítear Airteagal 10 mar a leanas:

(a) cuirtear an méid seo a leanas in ionad mhír (4):

'4. Measfar go bhfuil grúpa inréitithe má bhíonn sé indéanta agus inchreidte ag an mBord grúpeintitis a leachtú faoi ghnáthimeachtaí dócmhainneachta nó iad a réiteach trí uirlisí réitigh a chur i bhfeidhm agus cumhachtaí a fheidhmiú maidir le heintitis réitigh sin agus a mhéid is mó is féidir, aon iarmhairtí díobhálacha suntasacha a sheachaint i gcórais airgeadais na mBallstát ina bhfuil eintitis ar cuid de ghrúpa iad suite, nó na mBallstát eile, nó an Aontais, lena n-áirítear cásanna ina bhfuil éagobhsaíocht airgeadais níos leithne nó teagmhais shistéamacha, chun a áirithiú go leanfar d'fheidhmeanna criticiúla a dhéanann na grúpeintitis sin, i gcás inar féidir iad a dheighilt go héasca agus go tráthúil nó ar bhealach eile.

Tabharfaidh údarais réitigh leibhéal an ghrúpa fógra do ÚBE go tráthúil i gcás ina measfar nach mbeidh grúpa inréitithe.

Má bhíonn níos mó ná grúpa eintiteas amháin i ngrúpa, déanfaidh an Bord measúnú ar inréititheacht gach grúpa réitigh i gcomhréir leis an Airteagal seo.

Déanfar an measúnú dá dtagraítear sa chéad fhomhír le cois an mheasúnaithe ar inréititheacht an ghrúpa ina iomláine'.

(b) cuirtear an fhomhír seo a leanas le mír (7):

Déanfaidh an Bord fógra faoina mheasúnú ar an mbac ar inréititheacht an eintitis nó an ghrúpa a thabhairt don mháthairghnóthas de chuid an Aontais, i gcás ina bhfuil an bac sin ann mar gheall ar staid ar fíor an méid seo a leanas ina leith:

- (a) comhlíonann an t-eintiteas, ag an am céanna, an ceanglas maoláin chomhcheangailte a shainítear in Airteagal 128(6) i dTreoir 2013/36/AE agus i bpointe (a), i bpointe (b) agus i bpointe (c) d'Airteagal 141a(1) de Threoir 2013/36/AE, ach, ag an am céanna, ní comhlíonann sé an ceanglas maoláin chomhcheangailte a shainítear in Airteagal 128(6) i dTreoir 2013/36/AE agus an ceanglas dá dtagraítear i bpointe (d) d'Airteagal 141a(1) de Threoir 2013/36/AE; nó
- (b) ní comhlíonann an t-eintiteas na ceanglais dá dtagraítear in Airteagal 92a agus Airteagal 494 de Rialachán (AE) Uimh. 575/2013 ná na ceanglais dá dtagraítear in Airteagal 12d agus 12e.'

(c) cuirtear an fhomhír seo a leanas le mír (9):

'I gcás inarb é de bharr staid dá dtagraítear sa dara fomhír de mhír (7) gurb ann don bhac ar inréititheacht, molfaidh máthairghnóthas an Aontais don Bhord bearta lena bhféadfaí aghaidh a thabhairt ar

an mbac a aithníodh i gcomhréir leis an gcéad fhomhír, laistigh de dhá sheachtain ón dáta a bhfuarthas fógra arna thabhairt i gcomhréir le mír 7.

Cuirfear san áireamh, san amlíne chun bearta atá molta a chur chun feidhme, na cúiseanna atá leis an mbac lena mbaineann. Déanfaidh an Bord, tar éis dó dul i gcomhairle le BCE agus leis na húdaráis inniúla, measúnú a dhéanamh an dtugtar aghaidh, leis na bearta sin, ar an mbac substainteach lena mbaineann ar bhealach éifeachtach nó an gcuirtear deireadh leis an mbac leo". '

(d) i bpointe (i) agus i bpointe (j) de mhír (11), cuirtear 'Airteagal 12g agus Airteagal 12h' in ionad 'Airteagal 12'.

(e) i mír 19, cuirtear an méid seo a leanas isteach:

- (k) a chur de cheangal ar eintiteas plean a thíolacadh chun comhlíonadh Airteagal 12g agus Airteagal 12h a athbhunú, a chuirtear in iúl mar mhéid iomlán na neamhchosanta ar riosca a ríomhtar i gcomhréir le hAirteagal 92(3) de Rialachán (AE) Uimh. 575/2013 agus, i gcás inarb infheidhme, leis an gceanglas dá dtagraítear in Airteagal 128(6) de Threoir 2013/36/AE nó leis na ceanglais dá dtagraítear in Airteagal 12g nó Airteagal 12h a chuirtear in iúl mar chéatadán den bheart iomlán neamhchosanta dá dtagraítear in Airteagal 429 agus Airteagal 429a de Rialachán (AE) Uimh. 575/2013;
- (l) a chur de cheangal ar eintiteas athrú a dhéanamh ar phróifíl aibíochta ionstraimí cistí dílse tar éis comhaontú a bheith faighte aige ón údarás inniúil agus ar dhliteanais incháilithe dá dtagraítear in Airteagal 12c nó ar ítimí dá dtagraítear i bpointe (a) agus i bpointe (b) d'Airteagal 12h(3) chun a áirithiú go gcomhlíonfar Airteagal 12g agus Airteagal 12h ar bhonn leanúnach.'

4a. Tar éis Airteagal 10, cuirtear Airteagal 10a nua isteach:

"Airteagal 10a

An chumhacht roinnt dáiltí a thoirmeasc

(1) I gcás ina gcomhlíonann an t-eintiteas, ag an am céanna, an ceanglas maoláin chomhcheangailte a shainítear in Airteagal 128(6) de Threoir 2013/36/AE agus i bpointe (a), i bpointe (b) agus i bpointe (c) d'Airteagal 141a(1) de Threoir 2013/36/AE, ach nach gcomhlíonann sé an ceanglas maoláin chomhcheangailte a shainítear in Airteagal 128(6) de Threoir 2013/36/AE agus, ag an am céanna,

(i) na ceanglais dá dtagraítear in Airteagal 92a de Rialachán (AE) Uimh. 575/2013 agus

(ii) na ceanglais dá dtagraítear in Airteagal 12d agus 12e

nuair a ríomhtar iad i gcomhréir le pointe (a) d'Airteagal 12a(2), beidh an chumhacht ag an mBord eintiteas a thoirmeasc, i gcomhréir leis na coinníollacha i mír (2) agus i mír (3), níos mó ná an t-uasmhéid indéilte a bhaineann leis an íoscheanglas le haghaidh cistí dílse agus dliteanas incháilithe ('M-MDA') a ríomhtar i gcomhréir le mír 4 trí aon cheann de na gníomhaíochtaí a leanas:

- (a) dáileachán a dhéanamh i ndáil le caipiteal Ghnáthchothromas Leibhéal 1;
- (b) oibleagáid a chruthú chun luach saothair inathraitheach nó sochair phinsin lánroghnacha a íoc nó luach saothair inathraitheach a íoc más rud é gur cruthaíodh an oibleagáid chun íoc tráth ar mhainnigh an t-eintiteas na ceanglais maoláin chomhcheangailte a chomhlíonadh;
- (c) íocaíochtaí a dhéanamh ar ionstraimí Chaipiteal Breise Leibhéal 1.

Má bhíonn an t-eintiteas sa chás dá dtagraítear i bhfomhír 1, cuirfidh sé an Bord ar an eolas faoin sárú láithreach.

(2) Sa chás dá dtagraítear i mír 1, measúnóidh an Bord, tar éis dó dul i gcomhairle leis an údarás inniúil, gan mhoill neamhriachtanach, cibé an ndéanfaidh sé an chumhacht dá dtagraítear i mír 1 a fheidhmiú,

agus an méid seo a leanas á gcur san áireamh aige:

- (a) an chúis leis an sárú, a fhad agus a mhéid agus a thionchar ar inréititheacht;
- (b) staid airgeadais an eintitis a fhorbairt agus an chosúlacht go bhféadfaidh sé an coinníoll dá dtagraítear in Airteagal 18(1)(a) a chomhlíonadh go ceann i bhfad;
- (c) an fhéidearthacht go mbeidh an t-eintiteas in ann comhlíonadh na gceanglas dá dtagraítear i mír 1 a áirithiú laistigh de thréimhse ama réasúnta;
- (d) i gcás nach mbeidh an t-eintitis ábalta dliteanais a fháil in áit dliteanas nach gcomhlíonann na critéir incháilitheachta ná aibíochta a leagtar síos in Airteagal 72b agus 72c de Rialachán (AE) Uimh. 575/2013, Airteagal 12c nó Airteagal 12h(3), bíodh an neamhábaltacht neamhghnách nó mar thoradh ar shuaitheadh ar fud an mhargaidh,
- (e) arb é feidhmiú na cumhacht dá dtagraítear i mír 1 an modh is leordhóthanaí agus is comhréirí chun aghaidh a thabhairt ar chás an eintitis bunaithe ar an tionchar a d'fhéadfadh a bheith aige ar choinníollacha maoinithe agus ar inréititheacht an eintitis sin.

Déanfaidh an Bord a mheasúnú an athuair le féachaint faoin gcumhacht dá dtagraítear i mír 1 a fheidhmiú gach mí ar a laghad le linn an tsáraithe a fhad is a leanann an t-eintiteas de bheith sa chás dá dtagraítear i mír 1.

(3) Má mheasann an Bord go bhfuil an t-eintiteas fós sa chás dá dtagraítear i mír 1 sé mhí tar éis fógra a thabhairt faoin gcás sin, déanfaidh an Bord, tar éis dul i gcomhairle leis an údarás inniúil, an chumhacht dá dtagraítear i mír 1 a fheidhmiú ach amháin má mheasann an Bord go gcomhlíonfar [dhá] cheann de na coinníollacha seo a leanas ar a laghad:

(i) tarlaíonn an sárú mar gheall ar shuaitheadh tromchúiseach i bhfeidhmiú na margaí airgeadais, as a n-eascaíonn strus forleathan sa mhargadh airgeadais in an-chuid deighleoga de na margaí airgeadais;

(ii) an suaitheadh dá dtagraítear i bpointe (i), ní hamháin go mbíonn luaineacht mhéadaithe i bpraghas cistí dílse agus ionstraimí dliteanas incháilithe an eintitis nó costais bhreise don eintiteas mar gheall air, ach dúntar na margaí go hiomlán nó go páirteach, rud a chuireann cosc ar an eintiteas cistí dílse agus ionstraimí dliteanas incháilithe a eisiúint ar na margaí;

(iii) feictear go mbaineann dúnadh na margaí dá dtagraítear i bpointe (ii) ní hamháin leis an eintitis sin amháin ach le roinnt eintiteas eile freisin;

(iv) leis an suaitheadh dá dtagraítear i bpointe (i) toirmisctear an t-eintiteas i dtrácht go leor cistí dílse agus ionstraimí dliteanas incháilithe a eisiúint chun an sárú a leigheas;

(v) eascaíonn éifeachtaí iarmharta diúltacha as feidhmiú na cumhachta dá dtagraítear i mír 1 do chuid den earnáil baincéireachta, rud ar féidir leis an bonn a bhaint de chobhsaíocht airgeadais.

Nuair a chuirtear an eisceacht dá dtagraítear san fhomhír roimhe seo i bhfeidhm, tabharfaidh an Bord fógra don údarás inniúil maidir lena chinneadh agus míneoidh sé a mheasúnú.

Déanfaidh an Bord a mheasúnú an athuair ar choinníollacha na fomhíre roimhe seo gach mí le meas an féidir an eisceacht a chur i bhfeidhm.

(4) Ríomhfar 'M-MDA' tríd an tsuim arna ríomh i gcomhréir le mír 5 a iolrú faoin bhfachtóir arna chinneadh i gcomhréir le mír 6. Laghdófar "M-MDA" le haon cheann de na gníomhaíochtaí dá dtagraítear i bpointe (a), (b) nó (c) de mhír 1.

(5) Beidh sa tsuim atá le hiolrú i gcomhréir le mír 4 na nithe seo a leanas:

- (a) brabúis eatramhacha nach n-áirítear ar chaipiteal Ghnáthchothromas Leibhéal 1 de bhun Airteagal 26(2) de Rialachán (AE) Uimh. 575/2013 ar glanbhrabúis iad i ndáil le haon dáileachán brabús nó aon íocaíocht a bhaineann le haon cheann de na gníomhaíochtaí dá dtagraítear i bpointe (a), i bpointe (b) nó i bpointe (c) de mhír 1 den Airteagal seo;

móide

- (b) brabúis dheireadh na bliana nach n-áirítear ar chaipiteal Ghnáthchothromas Leibhéal 1 de bhun Airteagal 26(2) de Rialachán (AE) Uimh. 575/2013 ar glanbhrabúis iad i ndáil le haon dáileachán brabús nó aon íocaíocht a bhaineann le haon cheann de na gníomhaíochtaí dá dtagraítear i bpointe (a), i bpointe (b) nó i bpointe (c) de mhír 1 den Airteagal seo;

lúide

- (c) méideanna a bheadh le híoc i gcáin dá mba rud é go mbeadh na hítimí a shonraítear i bpointe (a) agus i bpointe (b) den mhír seo le coimeád.

(6) Déanfar an fachtóir a chinneadh mar a leanas:

- (a) nuair atá an caipiteal Gnáthchothromais Leibhéal 1 a choinníonn an institiúid nach n-úsáidtear chun aon cheann de na ceanglais cistí dílse a chomhlíonadh faoi Airteagal 92a de Rialachán (AE) Uimh. 575/2013 agus faoi Airteagal 12d agus Airteagal 12e a chuirtear in iúl mar chéatadán de mhéid iomlán na neamhchosanta ar riosca a ríomhtar i gcomhréir le hAirteagal 92(3) de Rialachán (AE) Uimh. 575/2013, laistigh den chéad cheathairíl (sin an cheathairíl is ísle) den cheanglas maoláin chomhcheangailte, is é 0 an fachtóir a bheidh ann;
- (b) nuair atá an caipiteal Gnáthchothromais Leibhéal 1 a choinníonn an institiúid nach n-úsáidtear chun aon cheann de na ceanglais cistí dílse a chomhlíonadh faoi Airteagal 92a de Rialachán (AE) Uimh. 575/2013 agus faoi Airteagal 12d agus Airteagal 12e a chuirtear in iúl mar chéatadán de mhéid iomlán na neamhchosanta ar riosca a ríomhtar i gcomhréir le hAirteagal 92(3) de Rialachán (AE) Uimh. 575/2013, laistigh den dara ceathairíl den cheanglas maoláin chomhcheangailte, is é 0,2 an fachtóir a bheidh ann;
- (c) nuair atá an caipiteal Gnáthchothromais Leibhéal 1 a choinníonn an institiúid nach n-úsáidtear chun na ceanglais cistí dílse a chomhlíonadh faoi Airteagal 92a de Rialachán (AE) Uimh. 575/2013 agus faoi Airteagal 12d agus Airteagal 12e a chuirtear in iúl mar chéatadán de mhéid iomlán na neamhchosanta ar riosca a ríomhtar i gcomhréir le hAirteagal 92(3) de Rialachán (AE) Uimh. 575/2013, laistigh den tríú ceathairíl den cheanglas maoláin chomhcheangailte, is é 0,4 an fachtóir a bheidh ann;
- (d) nuair atá an caipiteal Gnáthchothromais Leibhéal 1 a choinníonn an institiúid nach n-úsáidtear chun na ceanglais cistí dílse a chomhlíonadh faoi Airteagal 92a de Rialachán (AE) Uimh. 575/2013 agus faoi Airteagal 12d agus Airteagal 12e a chuirtear in iúl mar chéatadán de mhéid iomlán na neamhchosanta ar riosca a ríomhtar i gcomhréir le hAirteagal 92(3) de Rialachán (AE) Uimh. 575/2013, laistigh den cheathrú ceathairíl den cheanglas maoláin chomhcheangailte, is é 0,6 an fachtóir a bheidh ann;

Déanfar cuimsí íochtair agus uachtair gach ceathairíl den cheanglas maoláin chomhcheangailte a ríomh mar a leanas:

$$\text{Lower bound of quartile} = \frac{\text{Combined buffer requirement}}{4} \times (Qn - 1)$$

$$\text{Upper bound of quartile} = \frac{\text{Combined buffer requirement}}{4} \times Qn$$

Léiríonn "Q_n" orduimhir na ceathairíle lena mbaineann."

5. Cuirtear na hAirteagail seo a leanas in ionad Airteagal 12 de Rialachán (AE)

Uimh. 806/2014:

"Airteagal 12

An t-íoscheanglas maidir le cistí dílse agus dliteanais incháilithe a chinneadh"

1. Déanfaidh an Bord, tar éis dó dul i gcomhairle leis na húdaráis inniúla, lena n-áirítear BCE, na ceanglais a chinneadh maidir le cistí dílse agus dliteanais incháilithe amhail dá dtagraítear in Airteagail 12a go 12i, faoi réir cumhachtaí díluachála agus comhshó, a éilítear ar na heintitis agus ar na grúpaí dá dtagraítear in Airteagal 7(2), agus ar na heintitis agus ar na grúpaí dá dtagraítear in Airteagal 7(4)(b) agus (5) nuair a bheidh na coinníollacha maidir leis na míreanna sin a chur i bhfeidhm comhlíonta, a chomhlíonadh i gcónaí.

1a. Aon eintiteas agus eintitis atá mar chuid de ghrúpaí dá dtagraítear sa chéad mhír, déanfaidh siad an fhaisnéis dá dtagraítear in Airteagal 45i(1) de Threoir 2014/59/AE a chur faoi bhráid údarás réitigh náisiúnta an Bhallstáit rannpháirtigh ina bhfuil siad bunaithe.

Déanfaidh an t-údarás náisiúnta réitigh an fhaisnéis dá dtagraítear sa chéad fhomhír a tharchur chuig an mBord gan moill mhíchuí.

2. Nuair a bheidh pleananna réitigh á ndréachtadh i gcomhréir le hAirteagal 9, cinnfidh na húdaráis réitigh náisiúnta, tar éis dóibh dul i gcomhairle leis na húdaráis inniúla, na ceanglais maidir le cistí dílse agus dliteanais incháilithe, amhail dá dtagraítear in Airteagail 12a go 12i, faoi réir cumhachtaí díluachála agus comhshó, atá le comhlíonadh gach tráth ag na heintitis dá dtagraítear in Airteagal 7(3). Maidir leis sin, beidh feidhm ag an nós imeachta a bhunaítear in Airteagal 31.
3. Déanfaidh an Bord aon chinneadh dá dtagraítear i mír 1, comhthreomhar le forbairt agus cothabháil na bpleananna réitigh de bhun Airteagal 8.
4. Díreoidh an Bord a chinneadh ar na húdaráis réitigh náisiúnta. Déanfaidh na húdaráis réitigh náisiúnta treoracha an Bhoird a chur chun feidhme i gcomhréir le hAirteagal 29. Cuirfidh an Bord ceangal ar na húdaráis réitigh náisiúnta a fhóru agus a áirithiú go gcothabhálfaidh na hinstiúidí agus na máthairghnóthais na ceanglais maidir le cistí dílse agus dliteanais incháilithe a leagtar síos i mír 1 den Airteagal seo.
5. Cuirfidh an Bord BCE agus ÚBE ar an eolas faoi na ceanglais maidir le cistí dílse agus dliteanais incháilithe a bheidh cinnte aige do gach instiúid agus máthairghnóthas faoi mhír 1.
6. Chun cur i bhfeidhm éifeachtach agus comhsheasmhach an Airteagail seo a áirithiú, déanfaidh an Bord treoirlínte agus treoracha chun seoltaí a eisiúint chuig údaráis réitigh náisiúnta a bhaineann le heintitis sonracha nó le grúpaí sonracha.

Airteagal 12a

Cur i bhfeidhm agus ríomh an íoscheanglais maidir le cistí dílse agus dliteanais incháilithe

1. Áiritheoidh an Bord agus údaráis réitigh náisiúnta go gcomhlíonfaidh eintitis dá dtagraítear in Airteagal 12(1) agus Airteagal 12(2), i gcónaí, na ceanglais maidir le cistí dílse agus dliteanais incháilithe i gcás ina gceanglaítear sin le hAirteagal 12a go hAirteagal 12i agus i gcomhréir leis na hAirteagail sin.
2. Ríomhfar an riachtanas dá dtagraítear i mír 1 i gcomhréir le, Airteagal 12d(3) nó (4) de réir mar is infheidhme, mar an méid cistí dílse agus dliteanas incháilithe agus beidh sé arna léiriú mar chéatadán de:
 - (a) méid iomlán neamhchosaintí ar riosca an eintitis ábhartha dá dtagraítear i mír 1, arna ríomh i gcomhréir le hAirteagal 92(3) de Rialachán (AE) Uimh. 575/2013; agus
 - (b) tomhas iomlán neamhchosanta an eintitis ábhartha dá dtagraítear i mír 1 arna ríomh i gcomhréir le hAirteagal 429 agus 429a de Rialachán (AE) Uimh. 575/2013.

Airteagal 12b

Díolúine ón íoscheanglas maidir le cistí dílse agus dliteanais incháilithe

1. D'ainneoin Airteagal 12a, díolmhóidh an Bord ón riachtanas dá dtagraítear in Airteagal 12a(1) institiúidí creidmheasa morgáiste a mhaoinítear le bannaí faoi chumhdach nach bhfuil ceadaithe, de réir dlí náisiúnta, taiscí a fháil i gcás ina bhfuil na coinníollacha seo ar fad a leanas á gcomhlíonadh:

- (a) déanfar na hinstitiúidí sin a fhoirceannadh le nósanna imeachta náisiúnta dócmhainneachta, nó le cineálacha eile nós imeachta a chuirtear chun feidhme i gcomhréir le hAirteagail 38, 40 nó 42 de Threoir 2014/59/AE a leagtar síos do na hinstitiúidí sin; agus
- (b) áiritheofar trí nósanna imeachta náisiúnta dócmhainneachta den sórt sin, nó cineálacha eile nós imeachta, go n-íompróidh creidiúnaithe na n-institiúidí sin, lena n-áirítear sealbhóirí bannaí faoi chumhdach, más iomchuí, caillteanais ar shlí a chomhlíonann na cuspóirí réitigh.

2. Ní bheidh institiúidí atá díolmhaithe ón riachtanas leagtha síos in Airteagal 12(1) páirteach sa chomhdhlúthú dá dtagraítear in Airteagal 12g(1).

Airteagal 12c

Dliteanais incháilithe le haghaidh eintitis réitigh

1. Ní chuimseofar dliteanais incháilithe i méid chistí dílse agus dhliteanas na n-eintiteas réitigh ach má chomhlíonann siad na coinníollacha dá dtagraítear in Airteagal 72a, ach amháin i gcás phointe (d) d'Airteagal 72b(2) de Rialachán (AE) Uimh. 575/2013.

De mhaolú ar an gcéad fhomhír, i gcás ina dtagraítear leis an Rialachán seo do na ceanglais atá in Airteagal 92a nó in Airteagal 92b de Rialachán (AE) Uimh. 575/2013, is éard a bheidh i ndliteanais incháilithe chun críche na nAirteagal sin dliteanais incháilithe mar a shainítear iad in Airteagal 72k de Rialachán (AE) Uimh. 575/2013 agus mar a chinntear iad i gcomhréir le Caibidil 5a de Chuid a Dó, Teideal I den Rialachán sin.

2. De mhaolú ar phointe (1) d'Airteagal 72b(2) de Rialachán (AE) Uimh. 575/2013, ní chuimseofar dliteanais a thagann as ionstraimí fiachais ag a bhfuil gnéithe díorthacha, amhail nótaí struchtúrtha, i méid cistí dílse agus dliteanas na n-eintiteas réitigh ach má chomhlíontar na coinníollacha seo a leanas go léir:

- (a) tá príomhshuim den dliteanas a thagann as an ionstraim fiachais ar eolas roimh ré tráth na heisiúna, tá sé socraithe nó tá sé ag méadú agus níl tionchar ag gné dhíorthach air nó áirítear téarma conarthach san ionstraim fiachais ina sonraítear méid an éilimh i gcás réitigh;
- (b) is féidir seasamh an dliteanais a thagann as an ionstraim fiachais nó as an díorthach leabaithe a luacháil ar bhonn laethúil trí thagairt a dhéanamh do mhargadh dhá threo leachtach, gníomhach d'ionstraim chomhlíonann gan riosca creidmheasa i gcomhréir le hAirteagal 104 agus le hAirteagal 105 de Rialachán (AE) Uimh. 575/2013

nó áirítear téarma conarthach san ionstraim fiachais ina sonraítear méid an éilimh i gcás réitigh.

- (c) níl an ionstraim fiachais, lena n-áirítear a gné dhíorthach, faoi réir aon comhaontú glanluachála agus níl a luacháil faoi réir Airteagal 49(3) de Threoir 2014/59/AE;

Ní chuimseofar na dliteanais dá dtagraítear sa chéad fhomhír i méid na gcistí dílse agus dliteanas ach i gcás na coda a chomhfhreagraíonn don mhéid dá dtagraítear i bpointe (a) den chéad fhomhír.

2a. Maidir le dliteanais arna n-eisiúint ag fochuideachta atá bunaithe sa Bhallstát rannpháirteach agus ar cuid den ghrúpa réitigh céanna í leis an eintiteas réitigh do scairshealbhóir atá ann cheana agus nach cuid den ghrúpa réitigh céanna é, cuimseofar i méid chistí dílse agus dhliteanas incháilithe na n-eintiteas réitigh iad ar choinníoll go gcomhlíonfar na coinníollacha uile seo a leanas:

- a) déantar iad a eisiúint i gcomhréir le hAirteagal 12h(3)(a);
- b) nach ndéantar difear, le feidhmiú na cumhachta díluachála nó comhshó dliteanas den chineál sin i gcomhréir le hAirteagal 21, don rialú a dhéanann an t-eintiteas réitigh ar an bhfochuideachta;
- c) nach mó iad ná an méid a chinnfear tríd an méid dá dtagraítear i bpointe (i) a dhealú ón méid dá dtagraítear i bpointe (ii):
 - i. suim na ndliteanas a eisítear don eintiteas réitigh agus a cheannaigh an t-eintiteas réitigh sin go díreach nó go hindíreach trí eintitis eile sa ghrúpa réitigh céanna agus méid na gcistí dílse arna n-eisiúint i gcomhréir le hAirteagal 12h(3)(b);
 - ii. an méid is gá i gcomhréir le hAirteagal 12h(1).

3. Gan dochar don íoscheanglas atá in Airteagal 12d(3a) agus in Airteagal 12e(1)(a), áiríteoidh an Bord, ar a thionscnamh féin i ndiaidh dul i gcomhairle leis an údarás réitigh náisiúnta nó ar mholadh ó údarás réitigh náisiúnta, go gcomhlíonfaidh eintitis réitigh ar GSIIanna iad nó ar eintitis réitigh atá faoi réir Airteagal 12d(3a) agus (3b) iad, cuid den cheanglas dá dtagraítear in Airteagal 12g comhionann le 8% de na dliteanais iomlána, lena gcistí dílse agus le hionstraimí a chomhlíonann na coinníollacha ar fad dá dtagraítear in Airteagal 72a Uimh. 575/2013 cé is moite d'fhomhíreanna (3) go (5) d'Airteagal 72b den Rialachán sin. Arna iarraidh sin d'eintitis réitigh, agus ar choinníoll go sásaítear na coinníollacha atá leagtha síos i bpointí (a), (b) agus (c) d'Airteagal 72b(3) de Rialachán (AE) Uimh. 575/2013, féadfaidh an Bord leibhéal a cheadú is lú ná 8 % d'iomlán na ndliteanas, lena n-áirítear cistí dílse, ach is airde ná a ndíorthaítear as cur i bhfeidhm na foirmle $(1-X1/X2) \times 8\%$ ar iomlán na ndliteanas, lena n-áirítear cistí dílse; is é an leibhéal sin a bheidh le comhlíonadh, lena gcistí agus ionstraimí dílse féin, ag eintitis réitigh ar GSIIanna iad nó ag eintitis réitigh atá faoi réir Airteagal 12d(3a) agus (3b) agus a chomhlíonann na coinníollacha uile dá dtagraítear in Airteagal 72a de Rialachán (AE) Uimh. 575/2013 cé is moite de mhír (3) go mír (5) d'Airteagal 72b den Rialachán sin, i gcás inar fíor ina leith an méid seo thíos, agus urraim á tabhairt do chionroinnt an laghdaithe is ceadmhach faoi Airteagal 72b(3) de Rialachán Uimh. 575/2013:

$X1 = 3.5\%$ de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013.

$X2 =$ (i) 18% de mhéid iomlán na neamhchosanta ar riosca arna ríomh i gcomhréir le hAirteagal 92(3) de Rialachán (AE) Uimh. 575/2013 móide (ii) an ceanglas dá dtagraítear in Airteagal 128(6) de Threoir 2013/36/AE

4. I gcás eintitis réitigh nach GSIIanna ná eintitis réitigh iad atá faoi réir Airteagal 12d(3a) agus (3b), féadfaidh an Bord a chinneadh, ar a thionscnamh féin i ndiaidh dul i gcomhairle leis an údarás réitigh náisiúnta nó ar mholadh ó údarás réitigh náisiúnta, go gcomhlíonfaidh siad cuid den cheanglas dá dtagraítear in Airteagal 12g suas go cibé is airde, 8% de dhliteanais iomlána, lena n-áirítear cistí dílse, an eintitis nó an fhoirmle dá dtagraítear i mír 6 le cistí dílse agus le hionstraimí a chomhlíonann na coinníollacha ar fad dá dtagraítear in Airteagal 72a Uimh. 575/2013 cé is moite d'fhomhíreanna (3) go (5) d'Airteagal 72b den Rialachán sin, ar an gcoinníoll go gcomhlíontar na coinníollacha seo a leanas:

- (a) tá an rangú tosaíochta céanna ag dliteanais neamh-fho-ordaithe san ordlathas dócmhainneachta náisiúnta dá dtagraítear i bhfomhír (1) agus (2) agus atá ag dliteanais atá eisiata ó chur i bhfeidhm na gcumhachtaí díluachála nó comhshó i gcomhréir le hAirteagal 27(3) nó Airteagal 27(5);
- (b) an riosca go dtabhóidh creidiúnaithe éileamh a tháinig as dliteanais neamh-fho-ordaithe nach bhfuil eisiata ó chur i bhfeidhm cumhachtaí díluachála ná comhshó i gcomhréir le hAirteagal 27(3) nó Airteagal 27(5), go dtabhóidís caillteanais níos mó ná a thabhóidh siad i bhfoirceannadh faoi ghnáthimeachtaí dócmhainneachta mar gheall ar chur i bhfeidhm beartaithe cumhachtaí díluachála agus comhshó maidir leis na dliteanais sin;

(c) níl méid na ndliteanas fo-ordaithe os cionn an méid is gá chun a áirithiú nach dtabhóidh creidiúnaithe dá dtagraítear i bpointe (b) caillteanais os cionn leibhéal na gcaillteanas a thabhóidís ina mhalairt de chás i bhfoirceannadh faoi ghnáthimeachtaí dócmhainneachta.

I gcás ina gcinnfidh an Bord gurb amhlaidh, laistigh d'aicme dliteanas lena gcuimsítear dliteanais incháilithe, gur mó é méid na ndliteanas a bhfuil sé réasúnta dóchúil go n-eisiafar iad ó chur i bhfeidhm na gcumhachtaí díluachála nó comhshó i gcomhréir le hAirteagal 27(3) nó Airteagal 27(5), gur mó é ná 10% den aicme sin, déanfaidh sé an riosca dá dtagraítear i bpointe (b) den dara fomhír a mheasúnú.

5. Chun críche mhír 3 agus mhír 4, áireofar dliteanais dhíorthacha sna dliteanais iomlána ar bhonn go dtugtar lánaitheantas do chearta glánluachála contrapháirtí.

Cistí dílse de chuid eintiteas a úsáidtear chun an ceanglas dá dtagraítear in Airteagal 128(6) de Threoir 2013/36/AE a chomhlíonadh, beidh siad incháilithe chun an ceanglas dá dtagraítear i mír 3 agus i mír 4 a chomhlíonadh.

6. De mhaolú ar mhír 3, féadfaidh an Bord a chinneadh go ndéanfaidh eintitis réitigh ar GSIIanna iad nó ar eintitis réitigh atá faoi réir Airteagal 12d(3a) nó (3b) iad an ceanglas dá dtagraítear in Airteagal 12g a chomhlíonadh le hionstraimí a chomhlíonann gach coinníoll dá dtagraítear in Airteagal 72a de Rialachán (AE) Uimh. 575/2013 cé is moite de mhír (3) go mír (5) d'Airteagal 72b den Rialachán sin agus maidir le cistí dílse an eintitis, mar gheall ar an oibleagáid atá air na ceanglais dá dtagraítear in Airteagal 128(6) de Threoir 2013/36/AE, Airteagal 92a de Rialachán (AE) Uimh. 575/2013, Airteagal 12d(3a), agus Airteagal 12g a chomhlíonadh, nach mó na cistí sin ná an tsuim is airde den dá shuim seo a leanas – 8% de dhliteanais iomlána an eintitis nó an méid a thig as cur i bhfeidhm fhoirmle $[Ax^2 + Bx + C]$, i gcás inarb ionann A, B agus C agus na méideanna seo a leanas:

A=an méid a eascraíonn as an gceanglas dá dtagraítear in Airteagal 92(1)(c) de Rialachán (AE) Uimh. 575/2013 (Colún 1)

B=an méid a eascraíonn as an gceanglas dá dtagraítear in Airteagal 104a de Threoir 2013/36/AE (Colún 2R)

C=an méid a eascraíonn as an gceanglas dá dtagraítear in Airteagal 128(6) de Threoir 2013/36/AE, (ceanglas maoláin chaipitil chomhcheangailte)

7. Féadfaidh an Bord an chumhacht dá dtagraítear i mír 6 a fheidhmiú ar na heintitis réitigh ar G-SIIanna iad nó ar eintitis réitigh atá faoi réir Airteagal 12d(3a) nó (3b) iad agus a chomhlíonann ceann amháin de na coinníollacha seo thíos agus fad nach mó líon na n-eintiteas réitigh a shainaithnítear ná [50%] de na heintitis réitigh ar G-SIIanna iad nó ar eintitis réitigh atá faoi réir Airteagal 12d (3a) nó (3b) iad a gcinneann an Bord an ceanglas dá dtagraítear in Airteagal 12g ina leith:

(a) léirítear, leis an gceanglas dá dtagraítear in Airteagal 104a de Threoir 2013/36/AE go bhfuil an t-eintiteas réitigh ar G-SII é nó ar eintiteas réitigh atá faoi réir Airteagal 12d (3a) nó (3b) é, go bhfuil sé i measc na 20% d'institiúidí is mó riosca a gcinneann an Bord an ceanglas dá dtagraítear in Airteagal 12a ina leith, nó

(b) más rud é, gur sainaithníodh baic ar inréiteacht sa mheasúnú inréiteachta roimhe sin, agus:

(i) nach ndearnadh aon ghníomhaíocht feabhais tar éis chur i bhfeidhm na gcumhachtaí dá dtagraítear in Airteagal 10(11), san amlíne a éilíonn an t-údarás réitigh, nó

(ii) ní féidir aghaidh a thabhairt ar an mbac a sainaithníodh le haon cheann de na cumhachtaí dá dtagraítear in Airteagal 10(11), agus dhéanfaí tionchar diúltach an bhaic ar inréiteacht a chúiteamh go páirteach nó go hiomlán tríd an gcumhacht dá dtagraítear i mír 6 a fheidhmiú, nó

(c) go measann an t-údarás réitigh go bhfuil teorainn le hindéantacht agus le creidiúnacht straitéis réitigh tosaíochta an eintitis, agus aird á tabhairt ar mhéid agus idirnasacht an eintitis, nádúr, raon feidhme, riosca agus castacht ghníomhaíochtaí an eintitis, stádas dlíthiúil an eintitis agus struchtúr scairshealbhóireachta an eintitis.

Chun críocha na teorann dá dtagraítear sa chéad fhomhír, déanfaidh an t-údarás réitigh an uimhir a eascraíonn as an ríomh a shlánú suas go dtí an uimhir iomlán is gaire.

8. Na cinntí dá dtagraítear i mír 4 agus i mír 6, déanfaidh an Bord iad, i gcomhairle leis na húdaráis inniúla, lena n-áirítear BCE.

Agus an cinneadh dá dtagraítear i mír 3, i mír 4 agus i mír 6 á dhéanamh aige, cuirfidh an Bord an méid seo a leanas san áireamh freisin:

(a) doimhneacht an mhargaidh d'ionstraimí na hinstitiúide dá dtagraítear sa chéad fhomhír, praghsáil na n-ionstraimí sin atá ann cheana, agus an méid ama a bheidh ag teastáil chun aon idirbhearta a theastaíonn a fhorfheidhmiú chun go gcomhlíonfar an cinneadh dá dtagraítear sa chéad fhomhír;

(b) méid na n-ionstraimí dliteanais incháilithe a chomhlíonann na coinníollacha uile dá dtagraítear in Airteagal 72a de Rialachán (AE) Uimh. 575/2013 a bhfuil aibíocht iarmhair acu atá níos lú ná aon bhliain amháin amhail ón dáta ar ar cinneadh an ceanglas a chur i bhfeidhm d'fhonn go ndéanfaí coigeartuithe cainníochtúla ar an gceanglas dá dtagraítear sa chéad fhomhír;

(c) infhaighteacht agus méid na n-ionstraimí a chomhlíonann na coinníollacha uile dá dtagraítear in Airteagal 72a, cé is moite de phointe (d) d'Airteagal 72b(2) de Rialachán (AE) Uimh. 575/2013;

(d) an suntasach le hais dliteanais incháilithe agus cistí dílse institiúide é méid na ndliteanas a eisiatar ó chur i bhfeidhm na gcumhachtaí díluachála nó comhshó i gcomhréir le hAirteagal 27(3) nó le hAirteagal 27(5) a rangáítear, i ngnáthimeachtaí dócmhainneachta, ar aon chéim leis na dliteanais incháilithe is airde a rangáítear nó faoi bhun na ndliteanas sin.

I gcás nach mó méid na ndliteanas eisiata dá dtagraítear i bpointe (d) ná 5% de mhéid na gcistí dílse agus na ndliteanas incháilithe de chuid institiúide, measfar nach suntasach é an méid eisiata. Os cionn na teorann sin, déanfaidh an Bord a shuntasáí atá na dliteanais eisiata a mheasúnú.

(e) samhail ghnó, samhail mhaoinithe, agus próifíl riosca an eintitis, chomh maith lena chobhsaíocht agus a chumas rannchuidiú leis an ngeilleagar;

(f) an tionchar a bheadh ag costais fhéideartha athstruchtúrúcháin ar athchaipitliú an eintitis.

1. Is é an Bord, tar éis dó dul i gcomhairle leis na húdaráis inniúla, BCE san áireamh, a chinnfidh an ceanglas dá dtagraítear in Airteagal 12a(1), agus déanfaidh sé sin ar bhonn na gcritéar seo a leanas:

- (a) an gá a áirithiú gur féidir an grúpa réitigh a réiteach trí na huirlisí réitigh, lena n-áirítear, nuair is iomchuí, an uirlis tarrthála inmheánaí, ar chaoi lena gcomhlíontar na cuspóirí réitigh;
- (b) an gá atá ann a áirithiú, i gcásanna iomchuí, go mbeidh dliteanais incháilithe leordhóthanacha ag an eintiteas réitigh agus ag a bhfochuideachtaí ar institiúidí iad ach nach eintitis réitigh iad, chun a áirithiú, dá gcuirfí an uirlis tarrthála inmheánaí nó na cumhachtaí díluacháil agus comhshó i bhfeidhm maidir leo, faoi seach, gurbh fhéidir caillteanais a iompar agus na ceanglais chaipitil, agus, más infheidhme, cóimheas gearála na n-eintiteas ábhartha a thabhairt ar ais go dtí an leibhéal is gá chun gur féidir leo leanúint de bheith ag comhlíonadh na gcoinníollacha maidir le húdarú agus leanúint de na gníomhaíochtaí a bhfuil siad údaraithe ina leith faoi Threoir 2013/36/AE nó Treoir 2014/65/AE;
- (c) an gá atá ann a áirithiú gur leor, má tá coinne sa phlean réitigh gur féidir go mbeidh aicmí áirithe dliteanas incháilithe eisiata ón tarrtháil inmheánach de bhun Airteagal 27(5) nó go n-aistreofar iad chuig faighteoir go hiomlán faoi pháirt-aistriú, gur leor na dliteanais incháilithe eile atá ag eintiteas chun a áirithiú gur féidir caillteanais a iompar agus gur féidir an cóimheas caipitil iomlán, nó más infheidhme, cóimheas gearála an eintitis réitigh a thabhairt ar ais go dtí an leibhéal is gá chun gur féidir leis leanúint de bheith ag comhlíonadh na gcoinníollacha maidir le húdarú agus leanúint de na gníomhaíochtaí a bhfuil sé údaraithe ina leith faoi Threoir 2013/36/AE nó Treoir 2014/65/AE;

(d) méid, samhail ghnó, samhail mhaoinithe agus próifíl riosca na hinstitiúide agus an eintitis;

(e) a mhéid a dhéanfaidh cliseadh an eintitis ábhartha dochar do chobhsaíocht airgeadais, lena n-áirítear, mar gheall ar idirnascthaacht an eintitis le hinstitiúidí nó eintitis eile nó leis an gcuid eile den chóras airgeadais trí éifeacht tógálachta ar institiúidí nó eintitis eile.

2. Má fhoráiltear sa phlean réitigh go bhfuil an ghníomhaíocht réitigh le déanamh nó na cumhachtaí díluachála agus comhshó le cur i bhfeidhm, beidh an ceanglas dá dtagraítear in Airteagal 12a(1) cothrom le méid ar leor é chun a áirithiú:

(a) go n-iomprófar go hiomlán na caillteanais a mheastar a thabhoídh an t-eintiteas ('iompar caillteanais');

(b) go n-athchaipitleofar an t-eintiteas réitigh agus a fhochuideachtaí ar institiúidí iad, ach nach eintitis réitigh, go dtí an leibhéal is gá chun gur féidir leo leanúint de bheith ag comhlíonadh na gcoinníollacha maidir le húdarú agus leanúint de na gníomhaíochtaí a bhfuil siad údaraithe ina leith faoi Threoir 2013/36/AE nó Treoir 2014/65/AE ('athchaipitliú').

Má fhoráiltear sa phlean réitigh go bhfoirceannfar an t-eintiteas faoi ghnáthimeachtaí dócmhainneachta, nó faoi nósanna imeachta náisiúnta coibhéiseacha eile, measfaidh an Bord cé acu atá nó nach bhfuil bonn cirt le teorannú a dhéanamh ar an gceanglas dá dtagraítear in Airteagal 12a(1) le haghaidh an eintitis sin ionas nach mbeidh sé os cionn méid ar leor é chun caillteanais a iompar i gcomhréir le pointe (a) den chéad fhomhír.

Sa mheasúnú a dhéanfaidh an Bord, déanfar meastóireacht ar an teorainn dá dtagraítear san fhomhír sin roimhe seo maidir le haon tionchar a d'fhéadfadh a bheith ar an gcobhsaíocht airgeadais agus ar an riosca aicídithe i ndáil leis an gcóras airgeadais.

3. I gcás eintitis réitigh, is éard a bheidh sa mhéid dá dtagraítear i mír 2 an méid seo a leanas:

(a) suim:

(i) an méid caillteanais a bheidh le hiompar i réiteach a chomhfhreagraíonn do cheanglais an eintitis réitigh dá dtagraítear in Airteagal 92(1)(c) agus (c) de Rialachán (AE) Uimh. 575/2013 agus in Airteagal 104a de Threoir 2013/36/AE ar leibhéal comhdhlúite an ghrúpa réitigh;

(ii) méid athchaipitliúcháin lenar féidir leis an ngrúpa réitigh a tháinig as réiteach an comhlíonadh lena cheanglas i leith cóimheas caipitil iomlán dá dtagraítear in Airteagal 92(1)(c) de Rialachán (AE) Uimh. 575/2013 a athbhunú agus a cheanglas dá dtagraítear in Airteagal 104a de Threoir 2013/36/AE ar leibhéal comhdhlúite an ghrúpa réitigh tar éis gníomhaíocht réitigh a chur chun feidhme;

(b) suim:

(i) an méid caillteanais atá le hiompar i réiteach a chomhfhreagraíonn do chóimheas gearála an eintitis dá dtagraítear in Airteagal 92(1)(d) de Rialachán (AE) Uimh. 575/2013 ar leibhéal comhdhlúite an ghrúpa réitigh; agus

(ii) méid athchaipitliúcháin lenar féidir leis an ngrúpa réitigh a tháinig as réiteach an comhlíonadh leis an gceanglas cóimheasa gearála dá dtagraítear in Airteagal 92(1)(d) de Rialachán (AE) Uimh. 575/2013 a athbhunú ar leibhéal comhdhlúite an ghrúpa réitigh tar éis gníomhaíocht réitigh a chur chun feidhme;

Chun críocha phointe (a) d'Airteagal 12a(2)(a), sloinnfear an ceanglas dá dtagraítear in Airteagal 12a(1) i dtéarmaí céatadán mar an méid a ríomhadh i gcomhréir le pointe (a) roinnte ar mhéid na neamhchosanta ar riosca iomlán.

Chun críocha phointe (b) d'Airteagal 12a(2)(b), sloinnfear an ceanglas dá dtagraítear in Airteagal 12a(1) i dtéarmaí céatadán mar an méid a ríomhadh i gcomhréir le pointe (b) den mhír seo roinnte ar thomhas an chóimheasa gearála.

Nuair a bheidh na ceanglais aonair dá bhforáiltear i bpointe (b) den chéad fhomhír á socrú aige, cuirfidh an Bord san áireamh na ceanglais dá dtagraítear in Airteagal 27(7).

Agus na méideanna athchaipitliúcháin dá dtagraítear sna fomhíreanna sin roimhe seo á socrú aige, déanfaidh an Bord an méid seo a leanas:

(a) leas a bhaint as na luachanna tuairiscithe is déanaí le haghaidh mhéid iomlán ábhartha na neamhchosanta ar riosca nó le haghaidh mhéid ábhartha na neamhchosanta cóimheasa gearála arna choigeartú le haghaidh aon athruithe a thagann as gníomhaíochtaí réitigh dá bhforáiltear sa phlean réitigh; agus

(b) tar éis dó dul i gcomhairle le BCE agus leis na húdaráis inniúla, an méid atá comhfhreagrach leis an gceanglas atá ann faoi láthair dá dtagraítear in Airteagal 104a de Threoir 2013/36/AE a choigeartú síos nó suas chun an ceanglas is infheidhme a chinneadh maidir leis an eintiteas réitigh tar éis chur chun feidhme straitéis réitigh na tosaíochta.

Beidh an Bord in ann an ceanglas dá bhforáiltear i bpointe (a) (ii) den chéad fhomhír a mhéadú de mhéid iomchuí is gá chun a áirithiú go gcothóidh an t-eintiteas muinín mhargaidh leordhóthanach, tar éis an réitigh, ar feadh tréimhse ama iomchuí nach faide ná bliain amháin ('maolán muiníne margaidh').

I gcás ina mbeidh feidhm ag an bhfomhír thuas, déanfar an maolán muiníne margaidh a shocrú ionas gurb ionann é agus an comhcheanglas maoláin dá dtagraítear i bpointe (6) d'Airteagal 128 de Threoir 2013/36/ AE, cé is moite den cheanglas dá dtagraítear i bpointe (a) den fhoráil sin, a bheadh infheidhme tar éis chur i bhfeidhm na n-uirlisí réitigh.

Déanfar an méid sin a íslíú, más rud é, tar éis dó dul i gcomhairle leis an údarás inniúil, go gcinneann an Bord, gur indéanta agus inchreidte é gur leordhóthanach méid níos ísle chun muinín an mhargaidh a chaomhnú agus lena háirithiú go leanfaidh an institiúid d'fheidhmeanna criticiúla eacnamaíochta a sholáthar agus go mbeadh rochtain ar mhaoiniú gan gá le tacaíocht airgeadais urghnách seachas ranníocaíochtaí ó shocruithe maoinithe réitigh, i gcomhréir le hAirteagal 76(3) agus le hAirteagal 27(7), tar éis chur chun feidhme na straitéise réitigh. Déanfar an méid sin a ardú más rud é, tar éis dó dul i gcomhairle leis an údarás inniúil, go gcinneann an Bord gur gá leibhéal níos airde chun muinín mhargaidh leordhóthanach a chothú agus lena háirithiú go leanfaidh an institiúid d'fheidhmeanna criticiúla eacnamaíochta a sholáthar agus go mbeadh rochtain ar mhaoiniú gan gá le tacaíocht airgeadais urghnách seachas ranníocaíochtaí ó shocruithe maoinithe réitigh, i gcomhréir le hAirteagal 76(3) agus le hAirteagal 27(7), ar feadh tréimhse iomchuí ama nach faide ná bliain amháin.

3a. Le haghaidh eintitis réitigh nach bhfuil faoi réir Airteagal 92a de Rialachán (AE)

Uimh. 575/2013 agus atá mar chuid de ghrúpa réitigh ar mó ná EUR 100 billiún a shócmhainní iomlána, beidh leibhéal an cheanglais dá dtagraítear i mír 3 ar a laghad cothrom le ("Ceanglas colún 1 do na bainc is uachtaraí):

(a) 13.5 % nuair a ríomhtar i gcomhréir le pointe (a) d'Airteagal 12a(2), agus

(b) 5 % nuair a ríomhtar i gcomhréir le pointe (b) d'Airteagal 12a(2).

De mhaolú ar Airteagal 12c, na heintitis réitigh dá dtagraítear san fhomhír roimhe seo, comhlíonfaidh siad leibhéal an cheanglais dá dtagraítear sa mhír seo atá cothrom le 13.5 % nuair a ríomhtar i gcomhréir le pointe (a) d'Airteagal 12a(2) agus cothrom le 5 % nuair a ríomhtar i gcomhréir le pointe (b) d'Airteagal 12a(2) le dliteanais incháilithe a chomhlíonann na coinníollacha uile dá dtagraítear in Airteagal 72a de Rialachán (AE) Uimh. 575/2013, seachas míreanna (3) go (5) d'Airteagal 72b den Rialachán sin, dliteanais dá dtagraítear in Airteagal 12c (2a) nó cistí dílse.

3b. Arna iarraidh sin d'údarás náisiúnta réitigh de chuid eintiteas réitigh, déanfaidh an Bord na ceanglais íosta a leagtar síos i mír 3a a chur i bhfeidhm maidir le heintitis réitigh nach bhfuil faoi réir Airteagal 92a de Rialachán (AE) Uimh. 575/2013 agus atá mar chuid de ghrúpa réitigh ar lú ná EUR 100 billiún a shócmhainní iomlána, agus a measann an Bord gur dócha go réasúnta, dar leis an údarás náisiúnta réitigh, riosca sistéamach a bheith ag gabháil leo i gcás teipe.

Agus cinneadh á dhéanamh iarraidh a dhéanamh dá dtagraítear san fhomhír sin roimhe seo, déanfaidh an t-údarás náisiúnta réitigh an méid seo a leanas a chur san áireamh:

- (i) leitheadúlacht taiscí agus neamhláithreacht ionstraimí fiachais sa tsamhail chistiúcháin;
- (ii) rochtain theoranta ar na margaí caipitil le haghaidh dliteanais incháilithe;
- (iii) an spleáchas ar Ghnáthchothromas Leibhéal 1 chun an riachtanas dá dtagraítear in Airteagal 45(1) a chomhlíonadh.

4. I gcás eintitis nach eintitis réitigh iontu féin iad, is éard a bheidh sa mhéid dá dtagraítear i mír 2 an méid seo a leanas:

(a) suim:

(i) an méid caillteanais atá le hiompar a chomhfhreagraíonn do cheanglais an eintitis réitigh dá dtagraítear in Airteagal 92(1)(c) de Rialachán (AE) Uimh. 575/2013 agus Airteagal 104a de Threoir 2013/36/AE; agus

(ii) méid athchaipitliúcháin lenar féidir leis an eintiteas an comhlíonadh lena cheanglas i leith cóimheas caipitil iomlán dá dtagraítear in Airteagal 92(1)(c) de Rialachán (AE) Uimh. 575/2013, agus lena cheanglas dá dtagraítear in Airteagal 104a de Threoir 2013/36/AE, a athbhunú, tar éis fheidhmiú na cumhachta chun ionstraimí caipitil ábhartha agus dliteanais incháilithe a dhíluacháil nó a chomhshó i gcomhréir le hAirteagal 21 agus le réiteach an ghrúpa réitigh; nó

(b) suim:

(i) an méid caillteanais atá le hiompar a chomhfhreagraíonn do chóimheas gearála an eintitis dá dtagraítear in Airteagal 92(1)(d) de Rialachán (AE) Uimh. 575/2013; agus

(ii) méid athchaipitliúcháin lenar féidir leis an eintiteas an comhlíonadh lena cheanglas cóimheasa gearála dá dtagraítear in Airteagal 92(1)(d) de Rialachán (AE) Uimh. 575/2013 a athbhunú, tar éis fheidhmiú na cumhachta chun ionstraimí caipitil ábhartha agus dliteanais incháilithe a dhíluacháil nó a chomhshó i gcomhréir le hAirteagal 21 agus le réiteach an ghrúpa réitigh.

Chun críocha phointe (a) d'Airteagal 12a(2)(a), sloinnfear an ceanglas dá dtagraítear in Airteagal 12a(1) i dtéarmaí céatadán mar an méid a ríomhadh i gcomhréir le pointe (a) roinnte ar mhéid na neamhchosanta ar riosca iomlán.

Chun críocha phointe (b) d'Airteagal 12a(2)(b), sloinnfear an ceanglas dá dtagraítear in Airteagal 12a(1) i dtéarmaí céatadán mar an méid a ríomhadh i gcomhréir le pointe (b) den mhír seo roinnte ar thomhas an chóimheasa gearála.

Nuair a bheidh na ceanglais aonair dá bhforáiltear i bpointe (b) den chéad fhomhír á socrú aige, cuirfidh an Bord san áireamh na ceanglais dá dtagraítear in Airteagal 27(7).

Agus na méideanna athchaipitliúcháin dá dtagraítear sna fomhíreanna sin roimhe seo á socrú aige, déanfaidh an Bord an méid seo a leanas:

(a) leas a bhaint as na luachanna tuairiscithe is déanaí le haghaidh mhéid iomlán ábhartha na neamhchosanta ar riosca nó le haghaidh mhéid ábhartha na neamhchosanta cóimheasa gearála arna choigeartú le haghaidh aon athruithe a thagann as gníomhaíochtaí dá bhforáiltear sa phlean réitigh; agus

(b) tar éis dó dul i gcomhairle le BCE agus leis na húdaráis inniúla, an méid atá comhfhreagrach leis an gceanglas atá ann faoi láthair dá dtagraítear in Airteagal 104a de Threoir 2013/36/AE a choigeartú síos nó suas chun an ceanglas is infheidhme a chinneadh maidir leis an eintiteas ábhartha tar éis fheidhmiú na cumhachta chun ionstraimí caipitil ábhartha agus dliteanais incháilithe a dhíluacháil nó a chomhshó.

Beidh an Bord in ann an ceanglas dá bhforáiltear i bpointe (a) (ii) den chéad fhomhír a mhéadú méid iomchuí is gá chun a áirithiú, tar éis d'fheidhmiú na cumhachta chun ionstraimí caipitil ábhartha agus dliteanais incháilithe a dhíluacháil nó a chomhshó i gcomhréir le hAirteagal 21, go leanfaidh an t-eintiteas de na coinníollacha maidir le húdarú a chomhlíonadh agus go gcothaíonn sé muinín mhargaidh leordhóthanach ar feadh tréimhse iomchuí ama nach faide ná bliain amháin ('maolán muiníne margaidh').

I gcás ina mbeidh feidhm ag an bhfomhír thuas, déanfar méid an mhaoláin muiníne margaidh a shocrú ionas gurb ionann é agus an comhcheanglas maoláin dá dtagraítear i bpointe (6) d'Airteagal 128 de Threoir 2013/36/ AE, cé is moite den cheanglas dá dtagraítear i bpointe (a) den fhoráil sin, a bheadh infheidhme tar éis fheidhmiú na cumhachta dá dtagraítear in Airteagal 21 agus réiteach an ghrúpa réitigh.

Déanfar an méid sin a íslíú, más rud é, tar éis dó dul i gcomhairle leis an údarás inniúil, go gcinneann an Bord, gur indéanta agus inchreidte é gur leordhóthanach méid níos ísle chun muinín an mhargaidh a áirithiú agus lena háirithiú go leanfaidh an institiúid d'fheidhmeanna criticiúla eacnamaíochta a sholáthar agus go mbeadh rochtain ar mhaoiniú gan gá le tacaíocht airgeadais urghnách seachas ranníocaíochtaí ó shocruithe maoinithe réitigh, i gcomhréir le hAirteagal 76(3) agus le hAirteagal 27(7), tar éis fheidhmiú na cumhachta dá dtagraítear in Airteagal 21 agus réitigh an ghrúpa réitigh. Déanfar an méid sin a ardú más rud é, tar éis dó dul i gcomhairle leis an údarás inniúil, go gcinneann an Bord gur gá leibhéal níos airde chun muinín mhargaidh leordhóthanach a chothú agus lena háirithiú go leanfaidh an institiúid d'fheidhmeanna criticiúla eacnamaíochta a sholáthar agus go mbeadh rochtain ar mhaoiniú gan gá le tacaíocht airgeadais urghnách seachas ranníocaíochtaí ó shocruithe maoinithe réitigh, i gcomhréir le hAirteagal 76(3) agus le hAirteagal 27(7), ar feadh tréimhse iomchuí ama nach faide ná bliain amháin.

5. Má bhíonn an Bord ag súil go bhfuil sé réasúnta dóchúil go n-eisiafar, go hiomlán nó go páirteach, aicmí áirithe dliteanas incháilithe ón tarrtháil inmheánach de bhun Airteagal 27(5) nó go n-aistreofar iad go iomlán chuig faighteoir in aistriú páirteach, déanfar an ceanglas dá dtagraítear in Airteagal 12a(1) a chomhlíonadh le dliteanais eile incháilithe ar leor iad chun:

(a) méid na ndliteanas eisiata a sainithníodh i gcomhréir le hAirteagal 27(5) a chumhdach;

(b) a áirithiú go gcomhlíonfar na coinníollacha dá dtagraítear i mír 2.

6. I gcinneadh an údaráis réitigh íoscheangal cistí dílse agus dliteanas incháilithe a fhorchur faoin Airteagal seo, beidh na cúiseanna atá leis an gcinneadh sin, lena n-áirítear measúnú iomlán ar na heilimintí dá dtagraítear i míreanna 2 go dtí 5, agus déanfar

athbhreithniú air gan aon mhoill mhíchúí chun aon athruithe ar leibhéal an cheanglais dá dtagraítear in Airteagal 104a de Threoir 2013/36/AE a léiriú.

7. Chun críocha mhír 3 agus mhír 4, léirmhíneofar na ceanglais chaipitil i gcomhréir leis an gcur i bhfeidhm a dhéanann an t-údarás inniúil ar fhorálacha idirthréimhseacha a leagtar síos i gCaibidil 1, Caibidil 2 agus Caibidil 4 de Theideal I de Chuid a Deich de Rialachán (AE) Uimh. 575/2013 agus i bhforálacha na reachtaíochta náisiúnta a fheidhmíonn na roghanna a tugadh do na húdaráis inniúla leis an Rialachán sin.

Airteagal 12e

An t-íoscheanglas a chinneadh maidir le cistí dílse agus dliteanais incháilithe i gcás eintitis réitigh de chuid G-SIIanna agus fochuideachtaí ábhartha de G-SIIanna nach G-SIIanna de chuid an Aontais Eorpaigh iad

1. Beidh an t-íoscheanglas maidir le cistí dílse agus dliteanais incháilithe eintitis réitigh ar G-SII nó cuid de G-SII é déanta de na nithe seo a leanas:

(a) na ceanglais dá dtagraítear in Airteagal 92a agus Airteagal 494 de Rialachán (AE) Uimh. 575/2013; agus

(b) aon cheanglas breise maidir le cistí dílse agus dliteanais incháilithe arna chinneadh ag an mBord a bhaineann go sonrach leis an eintiteas i gcomhréir le mír 2, agus comhlíonfar an ceanglas sin le dliteanais a chomhlíonann coinníollacha Airteagal 12c.

1a. Is éard a bheidh sa cheanglas, dá dtagraítear in Airteagal 12a(1), ar eintiteas a bheidh faoi réir an cheanglais dá dtagraítear in Airteagal 92b agus in Airteagal 494 de Rialachán (AE) Uimh. 575/2013, na nithe seo a leanas:

(a) na ceanglais dá dtagraítear in Airteagal 92b agus Airteagal 494 de Rialachán (AE) Uimh. 575/2013; agus

(b) aon cheanglas breise maidir le cistí dílse agus dliteanais incháilithe arna chinneadh ag an údarás réitigh i gcomhréir le mír 2, agus comhlíonfar an ceanglas sin le dliteanais a chomhlíonann coinníollacha Airteagal 12h.

2. Ní forchuirfidh an Bord ceanglas breise maidir le cistí dílse agus dliteanais incháilithe dá dtagraítear i bpointe (b) de mhír 1 agus i bpointe (b) de mhír (1a) ach amháin sa chás seo a leanas:

(a) mura leor an ceanglas dá dtagraítear i bpointe (a) de mhír (1) agus de mhír (1a) chun na coinníollacha a leagtar amach in Airteagal 12d a chomhlíonadh; agus

(b) go dtí an pointe lena n-áiríteofar go gcomhlíonfar coinníollacha Airteagal 12d.

3. I gcinneadh an Bhoird ceanglas breise cistí dílse agus dliteanas incháilithe a fhorchur faoi phointe (b) de mhír 1, beidh na cúiseanna atá leis an gcinneadh sin, lena n-áirítear measúnú iomlán ar na heilimintí dá dtagraítear i mír 2, agus déanfar athbhreithniú air gan aon mhoill mhíchuí chun aon athruithe ar leibhéal an cheanglais dá dtagraítear in Airteagal 104a de Threoir 2013/36/AE is infheidhme maidir leis an ngrúpa réitigh a léiriú.

Airteagal 12g

An t-íoscheanglas maidir le cistí dílse agus dliteanais incháilithe a chinneadh a chur i bhfeidhm maidir le heintitis réitigh

1. Comhlíonfaidh eintitis réitigh na ceanglais a leagtar síos in Airteagal 12c go hAirteagal 12f ar bhonn comhdhlúite ar leibhéal an ghrúpa réitigh.

2. Cinnfidh an Bord, tar éis dó dul i gcomhairle le húdarás réitigh leibhéal an ghrúpa, más rud é nach ionann an t-údarás sin agus an Bord, agus leis an maoirseoir comhdhlúthaithe, an ceanglas dá dtagraítear in Airteagal 12a(1) ar eintiteas réitigh arna bhunú i mBallstát rannpháirteach ar leibhéal an ghrúpa chomhdhlúite, ar bhonn na gceanglas a leagtar síos in Airteagail 12d go 12f agus ar bhonn cé acu atá nó nach bhfuil fochuideachtaí tríú tír an ghrúpa le réiteach in éineacht leis an eintiteas réitigh de réir an phlean réitigh.

3. I gcás grúpaí réitigh mar a shainmhínítear iad i bpointe (b) d'Airteagal 3(1)(24b), cinnfidh an Bord, ag brath ar ghnéithe an tsásra dlúthpháirtíochta agus na straitéise réitigh tosaíochta cén bhealach a chomhlíonfaidh na heintitis réitigh atá sa ghrúpa réitigh na ceanglais dá dtagraítear in Airteagal 12d(3) agus (3a) chun a áirithiú go gcomhlíonfaidh an grúpa réitigh ina iomláine an ceanglas dá dtagraítear i mír (1) agus i mír (2).

Airteagal 12h

An ceanglas a chur i bhfeidhm maidir le heintitis nach eintitis réitigh iad féin

1. Comhlíonfaidh institiúidí ar fochuideachtaí d'eintiteas réitigh nó d'eintiteas tríú tír iad agus nach eintitis réitigh ná eintiteas nach bhfuil faoi réir Airteagal 12g(3) iad, na ceanglais a leagtar síos in Airteagal 12d agus Airteagal 12f ar bhonn aonair.

Féadfaidh údarás imréitigh, tar éis dul i gcomhairle leis an údarás inniúil agus BCE, cinneadh an ceanglas a leagtar síos san Airteagal sin a chur i bhfeidhm ar eintiteas dá dtagraítear i bpointí (b) d'Airteagal 2 de Threoir 2014/2/AE ar fochuideachta d'eintiteas réitigh é agus nach eintiteas réitigh ann féin é.

De mhaolú ar an gcéad fhomhír, déanfaidh máthairghnóthais de chuid an Aontais nach eintitis réitigh iad féin agus ar fochuideachtaí de chuid eintitis tríú tír iad, na ceanglais a leagtar síos in Airteagal 12e go hAirteagal 12g ar bhonn comhdhlúite.

I gcás grúpaí réitigh a aithnítear de bhun phointe (b) d'Airteagal 3(1)(24b), déanfaidh institiúidí creidmheasa atá cleamhnaithe le comhlacht lárnach agus comhlacht lárnach nach eintitis réitigh ceachtar acu, agus institiúidí creidmheasa atá cleamhnaithe le comhlacht lárnach agus comhlacht lárnach ar eintitis réitigh iad ach nach bhfuil faoi réir Airteagal 12g(3), na ceanglais a leagtar síos in Airteagal 12d a chomhlíonadh ar bhonn aonair.

Ceanglas dá dtagraítear in Airteagal 12a(1) de chuid eintitis dá dtagraítear sa mhír seo, cinnfear é ar bhonn na gceanglas a leagtar síos in Airteagal 12d.

2. An ceanglas dá dtagraítear in Airteagal 12a(1) maidir le heintitis dá dtagraítear sa chéad mhír, comhlíonfar na critéir incháilitheachta dá bhforáiltear i mír 3 leis.

3. Comhlíonfar an ceanglas dá dtagraítear in Airteagal 12a(1) le ceann amháin nó níos mó de na nithe seo a leanas:

(a) dliteanais ar fíor an méid seo a leanas ina leith:

(i) eisítear iad don eintiteas réitigh agus ceannaíonn an t-eintiteas sin iad go díreach nó go hindíreach trí eintitis eile sa ghrúpa réitigh céanna a cheannaigh na dliteanais ón eintiteas faoi réir an Airteagail seo nó a cheannaigh scairshealbhóir atá ann cheana nach bhfuil mar chuid den ghrúpa réitigh céanna chomh fada agus nach ndéantar difear, le feidhmiú na cumhachta díluachála nó comhshó i gcomhréir le hAirteagal 21, don rialú a dhéanann an t-eintiteas réitigh ar an bhfochuideachta;

(ii) comhlíonann siad na critéir incháilithe dá dtagraítear in Airteagal 72a, ach amháin pointí

(b), (c), (k), (l) agus (m) d'Airteagal 72b(2) agus Airteagal 72(b)(3) go (5) de Rialachán (AE) Uimh. 575/2013;

(iii) tá an rangú céanna acu, i ngnáthimeachtaí dócmhainneachta, agus atá ag ionstraimí cistí dílse nó tá siad rangaithe faoi bhun dliteanais nach gcomhlíonann an coinníoll dá dtagraítear i bpointe (i) agus nach bhfuil incháilithe do cheanglais cistí dílse;

(iv) tá siad faoi réir na cumhachta díluachála nó comhshó i gcomhréir le hAirteagal 21 atá comhsheasmhach le straitéis réitigh an ghrúpa réitigh, is é sin go háirithe gan difear a dhéanamh don rialú a dhéanann an t-eintiteas réitigh ar an bhfochuideachta;

(v) níl ceannach na ndliteanas cistithe go díreach ná go hindíreach ag an eintiteas a bheidh faoi réir an Airteagail seo;

(vi) ní thugtar le fios go sainráite ná go hintuigthe sna forálacha maidir leis na dliteanais go ndéanfadh an t-eintiteas na dliteanais a cheannach, a fhuascailt, a athcheannach nó a aisíoc go luath, de réir mar is infheidhme ag an eintiteas faoi réir an Airteagail seo ach amháin i gcás dhócmhainneacht nó leachtú an eintitis agus ní thugann an t-eintiteas an méid sin le fios ar aon slí eile;

(vii) ní thugann na forálacha maidir leis na dliteanais an ceart don sealbhóir dlús a chur faoi íocaíocht sceidealta an úis nó na príomhshuime amach anseo, ach amháin i gcás dhócmhainneacht nó leachtú an eintitis a bheidh faoi réir an Airteagail seo;

(viii) ní dhéantar leibhéal na n-íocaíochtaí dáileacháin, de réir mar is infheidhme, a bheidh dlite i leith na ndliteanas, a leasú ar bhonn acmhainneacht chreidmheasa an eintitis atá faoi réir an Airteagail seo nó acmhainneacht chreidmheasa a mháthairghnóthais.

(b) ionstraimí cistí dílse ar fíor an méid seo a leanas ina leith:

(i) eisítear iad d'eintiteas a chuimsítear sa ghrúpa réitigh céanna agus ceannaíonn na heintitis sin iad; nó

(ii) eisítear iad d'eintitis nach gcuimsítear sa ghrúpa réitigh céanna agus ceannaíonn na heintitis sin iad chomh fada agus nach ndéantar difear, le feidhmiú na cumhachta díluachála nó comhshó i gcomhréir le hAirteagal 21, difear don rialú a dhéanann an t-eintiteas réitigh ar an bhfochuideachta.

4. Féadfaidh an Bord a cheadú go gcomhlíonfar an ceanglas ina hiomláine nó i bpáirt le ráthaíocht arna soláthar ag an eintiteas réitigh agus lena gcomhlíontar na coinníollacha seo a leanas:

(a) tá an fhochuideachta agus an t-eintiteas réitigh bunaithe san aon Bhallstát rannpháirteach amháin agus is cuid den aon ghrúpa réitigh amháin iad;

(b) cuirtear an ráthaíocht ar fáil maidir leis an méid atá coibhéiseach le méid an cheanglais a dtéann sé ina ionad;

- (c) déantar an ráthaíocht a thionscnamh nuair nach bhfuil sé ar chumas na fochuideachta a fiacha nó dliteanais eile a ghlanadh nuair a bheidh siad dlite nó nuair a dhéantar cinneadh i gcomhréir le hAirteagal 21(3) i dtaca le fochuideachta, cibé acu is túisce a tharlóidh;
- (d) déantar an ráthaíocht a comhthaobhú le socrú airgeadais comhthaobhach mar a shainítear i bpointe (a) d'Airteagal 2(1) de Threoir 2002/47/EC ar 50% dá méid ar a laghad;
- (e) comhlíonann an chomhthaobhacht lena thacaítear an ráthaíocht ceanglais Airteagal 197 de Rialachán (AE) Uimh. 575/2013, méid atá leordhóthanach, agus caolchorrlaigh atá coimeádach go hiomchuí curtha i bhfeidhm, chun an méid a rathaítear a chumhdach go hiomlán;
- (f) tá an chomhthaobhacht lena dtacaítear leis an ráthaíocht neamhualaithe agus ní úsáidtear go háirithe í chun tacú le haon ráthaíocht eile;
- (g) tá aibíocht éifeachtach ag an gcomhthaobhacht a chomhlíonann an coinníoll aibíochta céanna dá dtagraítear in Airteagal 72c(1) de Rialachán (AE) Uimh. 575/2013; agus,
- (h) níl aon bhacainní dlíthiúla, rialála nó oibríochtúla ar aistriú na comhthaobhachta ón eintiteas réitigh chuig an bhfochuideachta ábhartha, i gcás ina ndéantar an gníomh réitigh i dtaca leis an eintiteas réitigh san áireamh. Arna iarraidh sin don Bhord, soláthróidh an t-eintiteas réitigh tuairim dhlíthiúil neamhspleách, réasúnaithe i scríbhinn uaidh nó léireoidh sé go sásúil, ar shlí eile, nach bhfuil aon bhacainní dlíthiúla, rialála ná oibríochtúla ar chomhthaobhacht a aistriú chuig an bhfochuideachta iomchuí.

Airteagal 12i

Tarscaoileadh an íoscheanglais maidir le cistí dílse agus dliteanais incháilithe a chur i bhfeidhm ar eintitis nach eintitis réitigh iad

1. Féadfaidh an Bord cur i bhfeidhm Airteagail 12h maidir le fochuideachta eintitis réitigh atá suite i mBallstát atá rannpháirteach a tharscaoileadh go hiomlán i gcás:
 - (a) ina bhfuil an fhochuideachta agus an t-eintiteas réitigh bunaithe san aon Bhallstát rannpháirteach amháin agus gur cuid den aon ghrúpa réitigh amháin iad;
 - (b) ina gcomhlíonann an t-eintiteas réitigh an ceanglas dá dtagraítear in Airteagal 12g;
 - (c) nach ann do bhac ábhartha praiticiúil nó dlíthiúil, ná súil le bac den sórt sin, ar an eintiteas réitigh cistí dílse a aistriú agus dliteanais a aisíoc go pras leis an bhfochuideachta i dtaca lena ndearnadh cinneadh i gcomhréir le hAirteagal 21(3), go háirithe nuair a dhéantar gníomh réitigh i dtaca leis an eintiteas réitigh.
2. Féadfaidh an Bord cur i bhfeidhm Airteagail 12h maidir le fochuideachta eintitis réitigh atá suite i mBallstát atá rannpháirteach a tharscaoileadh go hiomlán i gcás:
 - (a) ina bhfuil an fhochuideachta agus a máthairghnóthas nach eintiteas réitigh é bunaithe san aon Bhallstát rannpháirteach amháin agus gur cuid den aon ghrúpa réitigh amháin iad;
 - (b) ina gcomhlíonann an máthairghnóthas an ceanglas dá dtagraítear in Airteagal 12a(1) ar bhonn fo-chomhdhlúite;
 - (c) nach ann do bhac ábhartha praiticiúil nó dlíthiúil, ná súil le bac den sórt sin, ar an máthairghnóthas cistí dílse a aistriú agus dliteanais a aisíoc go pras leis an bhfochuideachta i dtaca lena ndearnadh cinneadh i gcomhréir le hAirteagal 21(3), go háirithe nuair a dhéantar gníomh réitigh i dtaca leis an máthairghnóthas.

Airteagal 12i1

Tarscaoileadh maidir le hinstitiúidí creidmheasa atá cleamhnaithe go buan le comhlacht lárnach

1. Féadfaidh an Bord, i gcomhréir le dlí náisiúnta Ballstáit rannpháirtigh, cur i bhfeidhm Airteagal 12g nó Airteagal 12h a tharscaoileadh d'institiúid chreidmheasa amháin nó níos mó atá cleamhnaithe go buan le comhlacht lárnach, i gcás ina gcomhlíontar na coinníollacha uile seo a leanas:
 - (a) tá na hinstitiúidí creidmheasa agus an comhlacht lárnach faoi réir maoirseacht ag an aon údarás inniúil amháin agus tá siad bunaithe san aon Bhallstát amháin agus is cuid den ghrúpa réitigh céanna iad;
 - (b) is dliteanais chomhpháirteacha agus leithleacha iad gealltanais an chomhlachta lárnaigh agus institiúidí cleamhnaithe, nó tá gealltanais a institiúidí cleamhnaithe ráthaithe go hiomlán ag an gcomhlacht lárnach;
 - (c) déantar faireachán ar an íoscheanglas le haghaidh chistí dílse agus dhliteanais incháilithe, shócmhainneacht agus leachtacht an chomhlachta lárnaigh agus na n-institiúidí cleamhnaithe uile ina n-iomlán ar bhonn chuntais chomhdhlúite na n-institiúidí sin;
 - (d) tá sé de chumhacht ag bainistíocht an chomhlachta lárnaigh treoracha a eisiúint do bhainistíocht na n-institiúidí cleamhnaithe; agus,
 - (e) comhlíonann an grúpa réitigh ábhartha an ceanglas dá dtagraítear in Airteagal 12g(3) agus,
 - (f) ní ann d'aon bhac praiticiúil ná dlíthiúil ábhartha reatha ná ionchais maidir le haistriú pras cistí dílse nó aisíocaíocht dliteanas ón gcomhlacht lárnach agus na hinstitiúidí creidmheasa atá cleamhnaithe leis i gcás réitigh.

Airteagal 12j

Sáruithe ar an íoscheanglas maidir le cistí dílse agus dliteanais incháilithe agus sáruithe ar threoir

1. Tabharfaidh an Bord agus údaráis ábhartha eile aghaidh ar aon sárú ar an íoscheanglas maidir le cistí dílse agus dliteanais incháilithe dá dtagraítear in Airteagal 12d nó in Airteagal 12e trí bhíthin ceann amháin, ar a laghad, díobh seo a leanas:
 - (a) na cumhachtaí aghaidh a thabhairt ar bhacainní ar inréititheacht nó iad a dhíothú i gcomhréir le hAirteagal 10;
 - (b) bearta dá dtagraítear in Airteagal 104 de Threoir 2013/36/CE;
 - (ba) cumhacht dá dtagraítear in Airteagal 10a;
 - (c) bearta luath-idirghabhála i gcomhréir le hAirteagal 13;
 - (d) pionóis riaracháin agus bearta riaracháin eile i gcomhréir le hAirteagal 110 agus le hAirteagal 111 de Threoir 2014/59/AE;
 - (e) measúnú ar cé acu atá nó nach bhfuil ag cliseadh ar an institiúid nó atá nó nach bhfuil sé dóchúil go mbeidh ag cliseadh uirthi, i gcomhréir le hAirteagal 18".
3. Rachaidh an Bord, údaráis réitigh agus údaráis inniúla Ballstát rannpháirteach i gcomhairle le chéile nuair a fheidhmeoidh siad a gcumhachtaí féin dá dtagraítear i bpointe (a) go pointe (e) de mhír 1.

Airteagal 12k

Socruithe idirthréimhseacha agus iar-réitigh

1. De mhaolú ar Airteagal 12a(1), cinnfidh an Bord idirthréimhse iomchuí le haghaidh eintiteas chun na ceanglais in Airteagal 12g nó in Airteagal 12h a chomhlíonadh, nó ceanglas dar bun Airteagal 12c(3), Airteagal 12c(4) nó Airteagal 12c(6) a chur i bhfeidhm, de réir mar is iomchuí. Lá Caille 2024 an spriocdháta faoi nach mór na ceanglais atá in Airteagal 12g nó 12h, nó an ceanglas de bharr chur i bhfeidhm Airteagal 12c(3), Airteagal 12c(4) nó Airteagal 12c(6), a chomhlíonadh.

Cinnfidh an t-údarás réitigh spriocleibhéal idirmheánach do na ceanglais atá in Airteagal 12g nó 12h, nó do cheanglas de bharr chur i bhfeidhm Airteagal 12c(3), Airteagal 12c(4) nó Airteagal 12c(6), mar is iomchuí, nach mór don institiúid nó don eintiteas dá dtagraítear i bpointí (b), (c) agus (d) d'Airteagal 1(1) a chomhlíonadh faoi Lá Caille 2022. Is ceart, de ghnáth, go n-áiritheofaí de bharr na sprice idirmheánaí sin méadú líneach ar na dliteanais incháilithe agus ar na cistí dílse ionsar an cheanglas.

Féadfaidh an Bord idirthréimhse a leagan síos is faide anonn ná an 1 Eanáir 2024, i gcás ina mbeidh údar cuí leis agus nuair is iomchuí ar bhonn na gcritéar dá dtagraítear i mír (4) agus tríd an méid seo a leanas a chur san áireamh:

- (a) forbairt staid airgeadais an eintitis;
- (b) go bhféadfadh an t-eintiteas a áirithiú go gcomhlíonfar na ceanglais in Airteagal 12g nó 12h nó ceanglas de bharr chur i bhfeidhm Airteagal 12c(3), Airteagal 12c(4) nó Airteagal 12c(6), laistigh de thréimhse ama réasúnta;
- (c) an mbeadh an t-eintitis ábalta dliteanais a fháil in áit dliteanas nach gcomhlíonann a thuilleadh na critéir incháilitheachta ná aibíochta a leagtar síos in Airteagal 72b agus 72c de Rialachán (AE) Uimh. 575/2013, Airteagal 12c nó Airteagal 12h(3), agus mura mbeadh, an neamhábaltacht neamhghnách a bheadh sa neamhábaltacht sin nó an toradh ar shuaitheadh ar fud an mhargaidh í.

1a. Lá Caille 2022 an spriocdháta faoi nach mór leibhéal íosta na gceanglas dá dtagraítear in Airteagal 12d(3a) agus (3b) a chomhlíonadh.

1b. Ní bheidh feidhm ag leibhéal íosta na gceanglas dá dtagraítear in Airteagal 12d(3a) agus (3b) maidir leis na cásanna seo a leanas:

(a) laistigh de thrí bliana tar éis an dáta a dtosaíonn an t-eintiteas réitigh a bheith sa staid dá dtagraítear in Airteagal 12d(3a) nó (3b);

(b) laistigh de dhá bhliain tar éis an dáta a gcuireann an Bord an uirlis díluachála fiachais i bhfeidhm;

(c) laistigh den dá bhliain tar éis an dáta ar chuir an t-eintiteas réitigh beart malartach ón earnáil phríobháideach i bhfeidhm dá dtagraítear i bpointe (b) d'Airteagal 18(1) lena ndearnadh ionstraimí caipitil agus dliteanais eile a dhíluacháil nó a chomhshó ina nGnáthchothromas Leibhéal 1 chun an t-eintiteas réitigh a athchaipitliú gan uirlisí réitigh a chur i bhfeidhm.

2. De mhaolú ar Airteagal 12a(1), cinntídh na húdaráis réitigh idirthréimhse iomchuí chun na ceanglais atá in Airteagal 12g nó in Airteagal 12h a chomhlíonadh, nó ceanglas de bhun chur i bhfeidhm Airteagal 12c(3), Airteagal 12c(4) nó Airteagal 12c(6), de réir mar is iomchuí, d'eintiteas a ndearnadh uirlisí réitigh, nó an chumhacht chun ionstraimí caipitil ábhartha agus dliteanais incháilithe a dhíluacháil nó a chomhshó, a chur i bhfeidhm maidir leo.

3. Chun críocha mhír 1, mhír 1a agus mhír 2, cuirfidh an Bord in iúl don eintiteas ICDI pleanáilte le haghaidh gach tréimhse 12 mhí le linn na hidirthréimhse d'fhonn an cumas ionsúcháin caillteanais agus athchaipitliúcháin aige a mhéadú arís diaidh ar ndiaidh. Ag deireadh na hidirthréimhse, beidh an ICDI cothrom leis an méid a chinnfear faoi Airteagail 12d(3a), 12d(3b), 12g, 12h, 12c(3), 12c(4) nó 12c(6), mar is infheidhme.
4. Agus na hidirthréimhsí á socrú acu, cuirfidh na húdaráis réitigh an méid seo a leanas san áireamh:
 - (a) leitheadúlacht taiscí agus neamhláithreachtaí ionstraimí fiachais sa tsamhail chistiúcháin;
 - (b) an rochtain ar na margaí caipitil le haghaidh dliteanais incháilithe;
 - (c) an spleáchas ar Ghnáthchothromas Leibhéal 1 chun freastal ar an riachtanas dá dtagraítear in Airteagal 12g.
5. Faoi réir mhír 1, ní chuirfear cosc ar an mBord athbhreithniú a dhéanamh, ina dhiaidh sin, ar an idirthréimhse nó ar aon ICDI pleanáilte a leagtar amach faoi mhír 3."
6. Leasaítear Airteagal 16 mar a leanas:
 - (a) cuirtear an méid seo a leanas in ionad mhír (2):

'2. Déanfaidh an Bord gníomhaíocht réitigh i ndáil le máthairghnóthas dá dtagraítear i bpointe (b) d'Airteagal 2 i gcás ina gcomhlíontar na coinníollacha a leagtar síos in Airteagal 18(1).';

(b) cuirtear an méid seo a leanas in ionad mhír (3):

'3. D'ainneoin nach gcomhlíonann máthairghnóthas na coinníollacha a leagtar síos in Airteagal 18(1), féadfaidh an Bord cinneadh ar ghníomhaíocht réitigh a dhéanamh maidir leis an máthairghnóthas sin más eintiteas réiteach é agus má chomhlíonann sé fochuideachta amháin nó níos mó dá chuid fochuideachtaí ar institiúidí iad agus nach eintitis réitigh iad na coinníollacha a leagtar síos in Airteagal 18(1) agus más rud é go gcuirfeadh cliseadh a sócmhainní agus a ndliteanais an institiúid nó an grúpa ina iomláine i gcontúirt agus más gá gníomhaíocht réitigh a dhéanamh maidir leis an máthairghnóthas sin na fochuideachtaí sin a réiteach ar institiúidí iad nó chun an grúpa ina iomláine a réiteach.'

7. Cuirtear 'ionstraimí caipitil ábhartha agus dliteanais incháilithe dá dtagraítear i bpointe (a) d'Airteagal 12h(3)' in ionad 'ionstraimí caipitil ábhartha' i bpointe (b) d'Airteagal 18(1).

7a. Cuirtear an mhír seo a leanas isteach i ndiaidh Airteagal 18(1):

1a. Féadfaidh an Bord scéim réitigh a ghlacadh i gcomhréir le hAirteagal 18(1) i ndáil le comhlacht lárnach agus i ndáil le gach institiúid creidmheasa atá cleamhnaithe, nuair a chomhlíonann an comhlacht lárnach agus na h-institiúidí creidmheasa atá cleamhnaithe, ina n-iomláine, na coinníollacha dá bhforáiltear i bpointe (a) go pointe (c) den chéad fhomhír d'Airteagal 18(1)."

8. Cuirtear an méid seo a leanas in ionad phointe (c) d'Airteagal 20(5):

'(c) nuair a chuirfear i bhfeidhm an chumhacht ionstraimí caipitil ábhartha agus dliteanais incháilithe a dhíluacháil nó a chomhshó i gcomhréir le hAirteagal 21(7), chun an cinneadh faoi mhéid an chealaithe nó an chaolaithe i dtaca le hionstraimí úinéireachta, agus faoi mhéid na díluachála nó an chomhshó i dtaca le hionstraimí caipitil ábhartha agus dliteanais incháilithe a chur in iúl;'

9. Leasaítear Airteagal 21 mar a leanas:

(a) cuirtear an méid seo a leanas in ionad an teidil:

'Díluacháil agus comhshó ionstraimí caipitil agus dliteanas incháilithe'

(b) cuirtear 'ionstraimí caipitil agus dliteanais incháilithe' in ionad 'ionstraimí caipitil' sa chéad abairt de mhír (1);

(c) cuirtear 'ionstraimí caipitil agus dliteanais incháilithe' in ionad 'ionstraimí caipitil' i bpointe (b) de mhír (1);

(d) cuirtear 'ionstraimí caipitil agus dliteanais incháilithe' in ionad 'ionstraimí caipitil' i bpointe (b) de mhír (3);

(e) cuirtear 'ionstraimí caipitil agus dliteanais incháilithe' in ionad 'ionstraimí caipitil' sa dara fómhír de mhír (8);

(f) cuirtear an méid seo a leanas in ionad mhír (7):

'7. Má chomhlíontar ceann amháin nó níos mó de na coinníollacha dá dtagraítear i mír 1, déanfaidh an Bord, agus é ag gníomhú faoin nós imeachta a leagtar síos in Airteagal 18, cinneadh an bhfeidhmeofar na cumhachtaí ionstraimí caipitil ábhartha a dhíluacháil nó a chomhshó go neamhspleách nó, i gcomhréir leis an nós imeachta faoi Airteagal 18, i gcomhcheangal le beart réitigh.

Ní fhéadfar an chumhacht dliteanais incháilithe a dhíluacháil nó a chomhshó a fheidhmiú neamhspleách ar ghníomhaíocht réitigh ach amháin maidir le dliteanais incháilithe a chomhlíonann na coinníollacha dá dtagraítear i bpointe (a) d'Airteagal 12h(3), seachas an choinníoll a bhaineann le haibíocht ar marthain dliteanas agus, nuair a fheidhmítear í, comhlíonfar pointe (g) d'Airteagal 15(1) léi. Tar éis fheidhmiú na cumhachta chun dliteanais incháilithe a dhíluacháil nó a chomhshó beag beann ar ghníomhaíocht réitigh, déanfar an luacháil dá bhforáiltear in Airteagal 20(16) agus beidh feidhm ag Airteagal 76(1)(e).

I gcás inar cheannaigh an t-eintiteas réitigh, go hindíreach trí eintitis eile san aon ghrúpa réitigh amháin, ionstraimí caipitil ábhartha agus dliteanais incháilithe ábhartha, feidhmeofar an chumhacht chun díluacháil nó comhshó a dhéanamh i dteannta fheidhmiú na cumhachta céanna ar leibhéal mháthairghnóthas an eintitis lena mbaineann nó máthairghnóthas ina dhiaidh sin nach eintitis réitigh iad ionas go gcuirtear na caillteanais ar aghaidh chuig an eintiteas réitigh agus ionas go ndéanann an t-eintiteas réitigh an t-eintiteas lena mbaineann a athchaipitliú.

I gcás ina ndéantar gníomhaíocht réitigh maidir le heintiteas ar eintiteas réitigh é nó, i gcúinsí eisceachtúla de dhiallas ón bplean réitigh, maidir le heintiteas nach eintiteas réitigh é, an méid a dhéanfar a laghdú, a dhíluacháil nó a chomhshó i gcomhréir le hAirteagal 21(10) ar leibhéal an eintitis sin, cuirfear san áireamh iad i dtaca leis na tairseacha a leagtar síos i bpointe (a) d'Airteagal 27(7) is infheidhme maidir leis an eintiteas lena mbaineann.'

(g) cuirtear an pointe seo a leanas le mír (10):

'(d) go ndíluachálfar nó go gcomhshóitear príomhshuim na n-ionstraimí incháilithe dá dtagraítear i mír 7 in ionstraimí Ghnáthchothromas Leibhéal 1 nó an dá rud, a mhéid is gá chun na cuspóirí réitigh a leagtar amach in Airteagal 14 a chomhlíonadh nó de réir chumas na n-ionstraimí caipitil ábhartha, cibé acu is ísle.'

11. In Airteagal 27(3), cuirtear an méid seo a leanas in ionad phointe (f):

'(f) dliteanas a bhfuil aibíocht níos lú ná seacht lá fágtha iontu, atá dlite do chórais nó d'oibreoirí córas atá ainmnithe i gcomhréir le Treoir 98/26/CE nó dá rannpháirtithe agus a thagann as rannpháirtíocht i gcóras den chineál sin, nó contrapháirtithe lárnacha a aithníonn ESMA;'

12. In Airteagal 27(3), cuirtear pointe (h) isteach:

'(h) dliteanas i leith eintiteas atá mar chuid den aon ghrúpa réitigh amháin gan a bheith ina n-eintiteas réitigh iad féin, beag beann ar a n-aibíochtaí ach amháin i gcás ina rangáítear na heintitis réitigh sin faoi ghnáthdhliteanas neamhurráithe faoi dhlí náisiúnta ábhartha an Bhallstáit rannpháirtigh a shocraíonn ordlathas na n-éileamh is infheidhme ar an [dáta a gcuirfear an Rialachán seo i bhfeidhm].

I gcás ina mbeidh feidhm ag an bhfomhír sin roimhe seo, déanfaidh an Bord measúnú ar cé acu a bheidh nó nach mbeidh an méid ionstraimí a chomhlíonann Airteagal 12h(3) leordhóthanach chun tacú le cur chun feidhme straitéis réitigh na tosaíochta.'"

12a. In Airteagal 27(5), cuirtear an fhomhír seo a leanas isteach tar éis na fomhíre is deireanaí:

"Déanfaidh an Bord measúnú cúramach ar cheart dliteanais i leith institiúidí nó eintiteas atá mar chuid den ghrúpa réitigh céanna ach nach eintitis réitigh iontu féin iad agus nach bhfuil eisiata ó chur i bhfeidhm cumhachtaí díluachála agus comhshó faoi mhír (3)(h) den Airteagal seo, ar cheart iad iad sin a eisiadh nó a eisiadh go páirteach faoi phointe (a) go pointe (d) den mhír seo chun cur chun feidhme éifeachtach na straitéise réitigh a áirithiú."

13. In Airteagal 31(2), cuirtear 'Airteagal 45h' in ionad 'Airteagal 45(9) go (13)'

Airteagal 6

Teacht i bhfeidhm

1. Tiocfaidh an Rialachán leasaithe seo i bhfeidhm an fichiú lá tar éis a fhoilsithe in Iris Oifigiúil an Aontais Eorpaigh.

2. Beidh feidhm ag an Rialachán seo faoi cheann 18 mhí ó dháta a theacht i bhfeidhm.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil,

Thar ceann Pharlaimint na hEorpa

Thar ceann na Comhairle

An tUachtarán

An tUachtarán